

摛藻堂四庫全書薈要

史部

欽定四庫全書薈要卷五千六百五十六

史部

宋史卷二十八

元中書右丞相總裁托克托等修

本紀第二十八

高宗五

五年春正月乙巳朔日有食之帝在平江府金人去濠州丁未戒諸軍戰陳母殺中原民籍充金兵者命粥官田宅輸錢專充軍費戊申進廬泰二州守禦官屬各一

官已酉詔前宰執呂頤浩等十九人及行在職事官各條上攻戰備禦措置綏懷之策免淮南官吏去職之罪仍令還任承州水砦統領仲諒復入楚州庚戌張浚遣統領楊忠閔王進夾擊金人于淮南岸敗之降其將程師回張延壽辛亥淮東統制崔德明襲敗金兵于盱眙召張浚赴行在乙卯浚入見賞沿江監司帥臣供億之勞各進官一等戊午趣修建康行宮己未詔減淮南諸州雜犯死罪釋流以下囚庚申置諸州軍教場選兵專

習弓弩立格按試辛酉贈殿中侍御史馬伸左諫議大  
夫韓世忠劉光世張俊入見壬戌以世忠為少保淮東  
宣撫使駐鎮江光世少保淮西宣撫使駐太平俊開府  
儀同三司江東宣撫使駐建康甲子酈瓊復光州降其  
守許約乙丑罷淮南茶鹽提刑司置提點兩路公事官  
一員兼領刑獄茶鹽漕運市易事淮西要會州軍並置  
市易務戊辰詔川陝宣撫司招諭陷賊官民庚午命王  
進合江西廣東諸將兵討周十隆海賊朱聰犯廣州又

犯泉州壬申劉光世韓世忠張俊入辭命升殿以光世  
世忠有隙賜酒諭釋之皆感激奉詔癸酉僞齊知亳州  
馬泰犯光州權州事王莘率兵拒之是月金主殂殂是  
之孫亶立岳飛自池州入朝二月丙子以飛為鎮寧崇  
信軍節度使命常州布衣陳得一造新歷丁丑帝發平  
江戊子遣權太常少卿張銖奉迎太廟神主于溫州壬  
午帝至臨安進扈從官吏秩一等丙戌以趙鼎為左僕  
射張浚右僕射並同中書門下平章事兼知樞密院事

都督諸路軍馬岳飛為荆湖南北襄陽府路制置使將  
兵平湖賊楊太丁亥吳璘楊政攻拔秦州執偽齊守胡  
宣金帥薩里罕來援政復擊敗之己丑詔建太廟壬辰  
命張浚詣江上措置邊防詔諭諸路宣撫制置司示以  
專任之旨以右司諫趙鼎論奏得體賜三品服丁酉進  
執政官秩一等以賞防秋之功戊戌詔淮南宣撫司撫  
存淮北來歸官吏軍民已亥直史館范沖上神宗實錄  
考異庚子詔翰林學士孫近胡交修類編臣僚條具利

害章疏以聞甲辰蠲湖南路上供三年是月僞齊商元  
寇信陽軍守臣舒繼明被禽死之閏月乙巳朔雨雹丁  
未胡松年罷戊申雪己酉留四川上供銀帛就充軍費  
乙卯以孟庾沈與求並兼權樞密院事丙辰併諸路提  
舉常平入茶鹽司罷福建鑄錢令轉運坑冶司辦集丁  
已撒離曷欲犯泰州吳玠遣部將牛皓伺之遇于瓦五  
谷戰死癸亥海賊陳感犯雷州官軍屢敗丁卯王瓊罷  
命戶部尚書章誼措置財用孟庾提領號總制司命川

陝宣撫司幕僚攝司事仍權節制軍馬戊辰置路分總  
管以處間退武臣辛未復置宗正丞掌修屬籍再蠲荆  
南府歸峽二州荆門公安二軍歲貢上供二年三月甲  
戌朔以王瓊貪縱不武敗師誤國責授濠州團練使丙  
子遣樞密計議官呂用中等分使兩浙江東西路檢察  
經總制司財用丁丑詔侍從至監察御史館職已上在  
內館職在外侍從官監司帥守各舉所知充監司守令  
尋命館職專舉縣令己卯以韓世忠兼鎮江府宣撫使

劉光世兼太平州宣撫使壬午以都督府參議軍事邵溥兼權川陝宣撫副使罷御前軍器所提舉官併隸工部壬辰命廣東福建路招捕朱聰乙未初權鉛錫張浚親討湖賊丁酉復移浙西安撫司于臨安府庚子罷饒州牧馬監夏四月丙午貴池縣丞黃大本坐枉法贓杖脊刺配南雄州丁未遣司農丞蓋諒持詔撫諭川陝召解潛赴行在王彥知荆南府諸鎮撫使至是盡罷戊申太廟神主至自溫州己酉以審量濫賞追左銀青光祿

大夫王序八官及職名仍改正出身庚戌詔內待遇特  
恩轉官止武功郎壬子訪得周後柴叔夏襲封崇義公  
戊午奉安太廟神主己未更免役保正長法甲子太上  
皇帝崩于五國城丙寅帝即射殿行朝獻景靈宮之禮  
始以惠恭皇后祔祭募民耕營田官給牛種庚午省四  
川添差官辛未以諸路稅賦疇零增收錢專充上供是  
月龍圖閣直學士致仕楊時卒五月乙亥初謁太廟庚  
辰命邵溥吳玠裁省四川冗官浮費辛巳名行宮新作

書院為資善堂遣何鮮等奉使金國通問二帝中書舍人胡寅言國家與金世讐無通使之義張浚奏使事兵家機權後將闢地復土終歸於和未可遽絕乃遣行丁亥立殘破州縣守令勸民墾田及拋荒殿最格己丑以孟庾知樞密院事壬辰召張浚還行在丁酉詔浚提舉詳定一司勅令戊戌以貴州防禦使瑗為保慶軍節度使封建國公徽猷閣待制范冲兼資善堂翊善起居郎朱震兼讚讀以盛暑命監司行部慮囚己亥岳飛軍次

鼎州庚子周十隆降辛丑命川陝訪求元祐黨人子孫  
六月甲辰封武經大夫令矼為安定郡王湖賊楊欽全  
琮劉詵相繼率衆詣岳飛降乙巳名新歷日統元丁未  
併饒州鑄錢司于虔州己酉命建國公瑗出就資善堂  
聽讀拜范冲朱震出內帑錢賜宗室貧者壬子復省淮  
南州縣冗官癸丑以久旱減膳祈禱禁諸路科率自租  
稅和市軍須外皆罷岳飛急攻湖賊水砦賊將陳瑫降  
楊太赴水死餘黨劉衡等皆降飛急擊夏誠斬之丁巳

湖賊黃誠斬楊太首挾鍾子儀周倫詣都督府降湖湘悉平得戶二萬七千悉遣歸業戊午減福建貢茶歲額之半庚申以旱罷諸路檢察財用官丁卯以賊平免沿湖民前二年逋租已巳罷福建諸州槍仗手秋七月壬申朔以仇念為沿海制置使甲戌免蘄州上供及租稅三年戊寅獎諭岳飛撫勞將士趣張浚還朝己卯孟庚罷以沈與求兼權樞密院事及措置財用壬午以金軍房州隸襄陽府路偽齊兵寇湖陽縣執唐州守臣高青

復釋之丁亥賜宇文虛中家福建田十頃甲午詔殘破  
州縣親民官計到罷之日戶口考殿最韓世忠復鎮淮  
軍禽偽齊守王拱丙申蠲湖南路上供米三年及秋租  
之半丁酉置高峯王口二砦都巡檢使益兵戍之八月  
壬寅朔罷荆南營田司令安撫司措置官兵耕種甲辰  
定館職額為十八員壬子詔淮南山水砦都巡檢各聽  
守令節制癸丑蠲福建州軍借撥常平錢米已未下詔  
示章惇蔡卞詆誣宣仁聖烈皇后之罪追貶惇昭化軍

節度副使卞單州團練副使子孫不許在朝命廣宮學  
教內外宗子辛酉詔淮南襄陽府等路團結民社丙寅  
以諸盜平減湖廣江西二十二州雜犯死罪釋徒杖以  
下囚海賊朱聰降命補水軍統領是月偽齊陷光州九  
月辛未朔罷總制司所增收頭子等諸色錢乙亥賜禮  
部進士汪洋以下二百二十人及第出身唱名始遵故  
典令館職侍立殿上壬午加岳飛檢校少保偽齊兵寇  
固始縣統領華旺拒戰却之尋復光州甲申命沿海州

軍籍海舶分守要害乙酉趙鼎上重修神宗實錄壬辰  
詔元符上書邪等范柔中等二十七人各官一子以解  
潛部兵三千隸馬軍司甲午周十隆復叛犯汀州戊戌  
遣統領王進李貴討之冬十月庚戌張浚入見乙卯以  
席益為四川制置大使位宣撫副使上州軍兵馬並隸  
大使司邊防重事仍令宣撫司處置李綱為浙西制置  
大使呂頤浩為湖南制置大使戊午詔川陝類試合格  
第一人依殿試第二人例推恩餘並同賜進士出身特

奏名進士命宣撫選官試時務策澧州賊雷德進降乙丑偽齊兵寇連水軍韓世忠遣統制呼延通等逆擊敗之十一月庚午朔初置節度使以下金字牙符命都督府掌之給將帥立戰功者命州縣賣戶帖以助軍費癸酉詔守臣死節昭著者毋限品秩並賜謚乙亥徵和靖處士尹焞于涪州命為崇政殿說書戊寅郊辛巳復置淮南提舉鹽事官壬午出宮女三千人甲申權減宰執及行在官吏奉乙酉以趙開為四川都轉運使丙戌命

張浚視師荆襄川陝戊子知衡州裴原坐調夫築城凍死二千餘人除名嶺南高州編管乙未出內帑綿絹賜宗室丁酉罷催稅戶長十二月己亥朔以岳飛為荆湖南北襄陽府路蘄黃州招討使楊沂中權主管殿前司併統神武中軍庚子改神武四軍及巡衛軍號行營五護軍辛丑以都督府兵隸三衙命左右司樞密院檢詳官參考中興已行條例修為定法乙巳禁服用翠羽己酉免侍從官輪對庚戌汰橫江水軍三之一癸丑命兩

淮川陝荆襄荆南諸帥府參謀官各一員提點屯田癸亥禁川陝州縣官悉用川陝人丙寅都督府遣參議軍事劉子羽主管機宜文字熊彥詩撫諭川陝且察邊備虛實戊辰夜雨雹

六年春正月辛未蠲貧民戶帖錢之半無物產者悉除之癸酉命給事中中書舍人甄別元祐黨籍乙亥以內重外輕命省臺寺監及監司守令居職及二年者許更迭出入除擢丁丑詔凡入粟補官者毋授親民刑法之

職壬午賜宗子伯玖名璫為和州防禦使罷綿州宣撫  
副使命吳玠專治兵事罷御史平反刑獄賞丙戌張浚  
視師荆襄入辭己丑安定郡王令矼薨庚寅還預借坊  
場錢辛卯詔監司帥臣慢令失職者令張浚黜陟以聞  
甲午振江湖福建浙東饑民命監司帥臣分選僚屬及  
提舉常平官躬行檢察戊戌命鬻通直郎閣門宣贊舍  
人以下官二月庚子以諸路宣撫制置大使並兼營田  
大使宣撫副使招討安撫使並兼營田使壬寅雨雪改

江淮屯田為營田甲辰置行在交子務印交子錢引給  
諸路令公私同見錢行用戊申岳飛入見復以襄陽府  
路為京西南路辛亥詔張浚暫赴行在奏事甲寅以兵  
部尚書都督府參謀折彥質簽書樞密院事乙卯韓世  
忠引兵攻宿遷縣統制呼延通與金兵戰敗之擒其將  
貝勒牙合澧州賊徒伍俊殺雷德進持其首詣鼎州降  
丙辰韓世忠圍淮陽軍復置諸路市易務戊午命楊沂  
中以兵萬人聽都督行府調遣己未遣戶部侍郎劉寧

止如鎮江府總領三宣撫司錢糧辛酉烏珠救淮揚韓世忠引兵歸楚州壬戌以折彥質兼權參知政事癸亥沈與求罷李綱入見是月張浚至江上會諸將議事命張俊進屯盱眙三月戊辰朔初收官告綾紙錢名均房州民兵曰保勝又命招刺三千人賜名必勝軍已巳以韓世忠為京東淮東路宣撫處置使岳飛為京西北路宣撫副使辛未蠲旱傷州縣民積欠錢帛租稅己卯趣岳飛如郢州措置軍事辛巳以樞密副都承旨馬擴

為沿海制置副使壬午金齊兵犯連水軍韓世忠擊敗之壬辰寃四川災傷州縣戶帖錢之半夏四月戊戌朔湖南賊黃旺犯桂陽監甲辰偽齊兵陷唐州團練判官扈舉臣推官張從之等皆死岳飛以母喪去官丙午詔飛起復己酉詔文武臣僚能決勝彊敵恢復境土者賜功臣號庚戌始訓諸宗子名甲寅賞淮陽功呼延通等進官有差餘受賞者凡萬七千人劉光世遣副統制王師晟酈瓊襲偽齊兵于劉龍城破之禽其統制華知剛

己未命福建安撫司發水軍討海賊鄭慶辛酉禁四川  
伐並邊山林甲予以韓世忠為橫海武寧安化軍節度  
使號揚武翊運功臣除商旅緝錢稅丙寅復行在官吏  
奉蠲東京民渡淮南商販之稅五月戊戌朔禁以鹿胎  
為冠癸酉詔未經上殿臣僚先令三省審察然後引對  
戊寅以四川監司地遠玩法應有違戾令制置大使按  
劾壬午詔大理寺議獄不合即詣刑部闕決刑部不能  
定同赴都堂稟議賜吳玠四川戶帖錢十萬緝擒軍癸

未禁淮南州縣收額外雜色租乙酉改交子為闕子罷  
交子務庚寅以劉光世為保靜寧武寧國軍節度使壬  
辰以張俊進屯盱眙改崇信奉寧軍節度使甲午禁銷  
錢及私鑄銅器丙申詔監司慮囚不能徧及者聽遣官  
著為令六月乙巳朔夜地震己酉求直言甲寅張浚渡  
江撫淮上諸屯命劉光世自當塗進屯廬州岳飛自九  
江進屯襄陽楊沂中屯泗州戊午詔兩淮沿江守臣並  
以兩三年為任辛酉封集英殿修撰令應為安定郡王

秋七月壬申以司農少卿樊賓提領營田公事癸未詔  
張浚暫赴行在癸巳罷川陝便宜差遣監司守貳以金  
州隸川陝路均房二州隸京西南路郭浩為永興軍路  
經畧安撫使兼知金州閣門宣贊舍人邵隆知商州聽  
浩節制經理商號是月劉光世復壽春府八月己亥范  
宗尹薨庚子賜左司諫陳公輔三品服癸卯以徽猷閣  
直學士李迨為四川都轉運使甲辰詔諭將士將親征  
岳飛遣統制牛皋破偽齊鎮汝軍禽其守薛亨乙巳命

權殿前司解潛等帥精兵扈從主管步軍司邊順留兵  
守臨安知臨安府梁汝嘉為巡幸隨軍都轉運使丁未  
以秦檜為醴泉觀使兼侍讀行宮留守孟庾提舉萬壽  
觀兼侍讀同留守戊申岳飛遣將楊再興復西京長水  
縣己酉命秦檜孟庾權參決尚書省樞密院事庚戌蠲  
虔州殘破諸縣逋負梅州夏秋兩稅聽廣東經畧安撫  
司便宜措置盜賊辛亥奉神主發臨安丁巳權罷經筵  
進講己未預借江浙民來年夏稅純帛折米輸官庚申

增給職事官米月三斛是月張浚城盱眙進屯泗州岳  
飛及偽齊李成孔彥舟連戰至蔡州克之偽守劉永壽  
舉城降九月丙寅朔帝發臨安岳飛遣統制王貴郝晟  
董先復虢州盧氏縣癸酉帝次平江戊寅命職事官日  
一員輪對壬午岳飛以孤軍無援復還郢州癸未權奉  
安神主于平江能仁寺戊子以戶部郎官霍蠡總領岳  
飛軍錢糧庚寅張浚入奏復如鎮江辛卯立賊徒相招  
首罪賞格賞鎮淮軍功進統制王德等官是月劉豫聞

親征告急于金主宣求援宣不許豫自起兵三十萬命  
子麟趣合肥姪貌出渦口引兵分道入寇冬十月丙申  
招西北流寓人補闕額禁軍丁酉裁定淮南路租額劉  
麟寇淮西張浚遣楊沂中張宗顏等分兵禦之戊戌沂  
中至濠州劉光世已棄廬州而南浚遣人督還光世不  
得已駐兵應沂中遣統制王德酈瓊及賊將崔臯賈澤  
王遇戰皆敗之賊兵攻壽春府芍陂砦守臣孫暉拒戰  
又敗之辛丑罷四川監酒官百餘員壬寅以梁汝嘉兼

浙西淮東沿海制置使前護副軍都統制王彥副之癸  
卯趙鼎請降勑諭張浚令光世沂中及張俊全軍引還  
為防江之計甲辰又詔浚督將士僇力破賊皆未達劉  
猊犯定遠縣沂中進戰大敗之于蘓塘猊挺身遁麟在  
順昌聞之拔砦去劉光世遣王德及沂中追麟至南壽  
春而還孔彥舟亦解光州圍而去戊申命解潛遣兵千  
人守青龍港口癸丑張俊楊沂中引兵攻壽春府不克  
而還乙卯詔諸軍所俘人民給錢米遣歸丁巳惠州軍

賊曾袞作亂庚申摧鋒軍統制韓京募敢死士夜襲破  
之袞尋出降壬戌日中有黑子沒十二月甲午朔詔降  
廬光濠等州死罪釋流以下囚召秦檜赴行在張浚入  
見請幸建康趙鼎請還臨安戊戌韓世忠攻淮陽軍及  
金人戰敗之辛丑城南壽春府壬寅趙鼎罷遣右司員  
外郎范直方宣諭川陝撫問吳玠將士甲辰命都督府  
參議軍事呂祉如建康措置移蹕丙午折彥質罷丁未  
賞淮西功加張俊少保改鎮洮崇信奉寧軍節度使楊

沂中保成軍節度使殿前都虞候戊申命秦檜赴講筵  
供職孟庾為行宮留守辛亥以資政殿學士張守參知  
政事兼權樞密院事丙辰以呂頤浩為浙西安撫制置  
大使判臨安府丁巳以劉光世為護國鎮安保靜軍節  
度使戊午詔凡因民事被罪者不許親民己未命辰沅  
靖澧四州以閒田募刀弩手三千五百人為額右司諫  
陳公輔乞禁程氏學詔士大夫之學宜以孔孟為師庶  
幾言行相稱可濟時用庚申以安化郡王王稟死節太

原賜其家田十頃辛酉以山陰諸暨等四十縣為大邑  
並命堂除

七年春正月癸亥朔帝在平江下詔移蹕建康蠲無為  
軍稅役一年置建康御前軍器局丁卯賞張浚以破敵  
功遷特進己巳發米萬石濟京東陝西來歸之民張浚  
入見甲戌罷都督府諸州市易官丁丑解潛罷以劉錡  
權主管馬軍司并殿前步軍司公事庚辰築采石宣化  
渡二城癸未以翰林學士陳與義參知政事資政殿學

士沈與求同知樞密院事詔廣西帥臣訓練土丁保丁  
乙酉復置樞密使副知院以下仍舊張浚改兼樞密使  
丙戌禁諸軍互納亡卒西蕃三十八族首領趙繼忠等  
來歸丁亥以秦檜為樞密使何鮮范寧之至自金國始  
聞上皇及寧德皇后崩己丑帝成服下詔降徒囚釋杖  
以下辛卯夜東北有赤氣如火二月癸巳朔日有食之  
百官七上表請遵以日易月之制徽猷閣待制知嚴州  
胡寅請服喪三年衣墨臨戎以化天下帝欲遂終服而

張浚連疏論喪服不可即戎遂詔外朝勉從所請宮中  
仍行三年之喪丙申太平州火丁酉鎮江府火庚子遣  
王倫等使金國迎奉梓宮岳飛入見辛丑以日食求直  
言以久旱命諸州慮囚乙巳詔允辟舉官犯贓罪罪及  
所舉官丙午吳玠置銀會于河池丁未詔席益募陝  
西河東河北兵三千部送行在充扈衛癸丑雨雹丙辰  
始御便殿果州守臣宇文彬等進禾登九穗圖俱奪一  
官罷之丁巳以岳飛為太尉湖北京西宣撫使己未帝

發平江三月癸亥朔次丹陽韓世忠入見命世忠扈從  
岳飛次之甲子次鎮江楊沂中入見命沂中總領彈壓  
巡幸事務己丑蠲駐蹕及經從州縣積年逋賦丁卯以  
吏部侍郎呂祉為兵部尚書都督府參謀軍事辛未帝  
至建康壬申詔尚書省常程事從參知政事分治癸酉  
減建康流罪以下囚蠲建康府太平宣州逋賦及下戶  
今年身丁錢岳飛乞併統淮西兵以復京畿陝右許之  
命飛盡護王德等諸將軍既而秦檜等以合兵為疑事

遂寢戊寅手詔撫勞將士進沈與求知樞密院事己卯  
尊宣和皇后為皇太后庚辰以王彥兵隸侍衛馬軍司  
呂頤浩為少保兼行宮留守孟庾罷甲申以劉光世為  
少師萬壽觀使以其兵隸都督府張俊因分為六軍命  
呂祉節制乙酉賜光世第于建康府丁亥命虔吉南安  
軍諸縣各募土兵百人責知縣訓練防禦盜賊是春廣  
西大饑李實變為桃夏四月癸巳築太廟于建康以臨  
安府太廟為聖祖殿戊戌修濬建康城池丁未岳飛乞

解官持餘服遂棄軍去詔不許戊申日中有黑子庚戌  
以張浚累陳岳飛積慮專在併兵奏牘求去意在要君  
遂命兵部侍郎兼都督府參議軍事張宗元權湖北京  
西宣撫判官實監其軍壬子張浚如太平州淮西視師  
庚申以信陽軍隸京西路罷淮南提點司東西兩路各  
置轉運兼提點刑獄提舉茶鹽常平事五月丁卯詔李  
綱趣捕虔吉諸盜壬申命禮官舉文宣王武成王熒惑  
壽星獄鎮海瀆農蠶風雷雨師之祀甲戌以胡安國提

舉萬壽觀兼侍讀趣赴行在未至而罷癸未以鄆瓊為  
行營左護軍副都統制甲申初試樞密院都督府効士  
乙酉命侍從官通舉材堪知縣者二十人丙戌偽齊陷  
隨州己丑禁四川增印錢引六月辛卯朔改上惠恭皇  
后謚曰顯恭皇后岳飛入見壬辰命歲辰戌月祀大火  
配以閼伯乙未罷江淮營田司令諸路安撫轉運司兼  
領其事丙申以重脩神宗實錄去取未當命史館復加  
考訂丁酉岳飛引過自効詔放罪慰諭之戊戌命劉錡

兼都督府咨議軍事率兵戍廬州乙巳沈與求薨召王德以所部兵赴行在遣呂祉如淮西撫諭諸軍丙辰詔吳玠李迨共議四川經費贍軍恤民岳飛復職秋七月戊辰詔侍從各舉可任監司郡守者一二人癸酉以旱禱於天地宗廟社稷甲戌嗣濮王仲湜薨癸未以久旱命中外臣庶實封言事甲申蠲諸路民積年逋租以建康疫盛遣醫行視貧民給錢葬其死者命疎決滯獄乙酉詔即建康權正社稷之位戊子詔戶部長貳迭出巡

按諸路考究財賦利病違者劾之己丑詔諸路歸業民墾田及八年始輸全稅八月乙未以張俊為淮西宣撫使駐盱眙楊沂中為淮西制置使主管侍衛馬軍司劉錡副之並駐廬州命酈瓊率兵赴行在戊戌瓊叛殺中軍統制張景等執呂祉及趙康直趙不羣以兵四萬人奔劉豫辛丑手詔赦廬州屯駐行營左護軍壬寅酈瓊引兵至淮殺祉及康直釋不羣使還劉錡吳錫至廬州以兵追之不及命張宗元往招之張俊乞去位甲辰以

趙鼎為萬壽觀使兼侍讀甲寅詔命犯官贓刑部不得擅黥配聽朝廷裁斷乙卯賜岳飛軍錢十萬緡招歸正復業人耕湖北京西閒田九月甲子上太上皇帝謚曰聖文仁德顯孝皇帝廟號徽宗皇后曰顯肅皇后丁卯韓世忠張俊入見乃命俊自盱眙移屯廬州壬申張浚罷癸酉命參知政事輪日當筆權三省事更不分治常程罷都督府甲戌以臺諫累疏落張浚觀文殿大學士仍領宮祠丙子復以趙鼎為尚書左僕射同中書門下

平章事兼樞密使戊寅以廬州壽春府民遭酈瓊虜掠  
蠲租稅一年己卯朝獻聖祖于常朝殿庚辰朝饗太廟  
辛巳合祭天地于明堂大赦召劉光世赴行在戊子禁  
諸路進羨餘以劉錡知廬州兼淮西制置副使冬十月  
庚寅朔詔仍舊開經筵辛卯命後省官看詳上書有可  
采者條上行之丁酉夜勅張浚安置嶺表戊戌趙鼎累  
請浚母老改永州居住偽齊犯泗州守臣劉絅擊走之  
丙午命戶部郎官薛弼霍蠡同總領江西湖廣五路財

賦壬子統制呼延通王權等襲擊金人于淮陽軍敗之  
丁巳詔六參日輪行在百官一員轉對閏月癸亥贈趙  
康直徽猷閣待制乙丑蠲江東路月椿錢萬緡發米二  
萬石振京西北饑民丙寅尹焞入見命為秘書郎兼  
崇政殿說書甲戌始作徽宗皇帝顯肅皇后神主庚辰  
韓世忠引兵渡淮逆擊金人于劉冷莊敗之辛巳李納  
罷癸未復漢陽軍是月張俊棄盱眙引兵還建康十一  
月丙申賜吳玠犒軍錢百五十萬緡丁酉以知溫州李

光為江西安撫制置大使丁未金帥達蘭烏珠入汴京執偽齊劉豫廢為蜀王癸丑詔來春復幸浙西是月偽齊知臨汝軍崔虎詣岳飛降十二月庚辰復置都大提舉四川茶馬監牧官丁卯祔徽宗皇帝顯肅皇后神主于太廟庚午以解潛權主管馬步軍司命韓世宗留屯楚州屏蔽江淮己卯詔內外大將及侍從官舉武臣智畧器局堪帥守謀議官者癸未王倫等使還入見言金國許還梓宮及皇太后又許還河南諸州甲申城泗州

丁亥復遣王倫等奉迎梓宮是冬吳玠遣裨將馬希仲  
攻熙州鄭宗李進攻鞏州不克宗死于城下希仲遁還  
玠斬以徇

宋史卷二十八

謹案卷二十七第二頁後六行私有私造兵器案

私有二字疑訛

第十頁前一行捕討湖寇刊本湖訛胡據後文改


卷二十八第三頁後六行薩里罕欲犯泰州按泰

應作秦今改



總校官庶吉士臣張能照  
校對官檢討臣蕭九成

謄錄貢生臣郭棣泰



欽定四庫全書會要

史部

宋史卷二十九

三十

詳校官編修臣王天祿



欽定四庫全書  
會要卷五千六百五十七

史部

宋史卷二十九

元中書右丞相總裁托克托等修

紀第二十九

高宗六



八年春正月戊子朔帝在建康丙申減臨安府夏稅折輸錢戊戌張守寵辛丑僞齊知壽州宋超率兵民來歸蔡州提轄白安時殺金將烏嚕執其守劉永壽來降詔

以方議和好禁沿海州郡遣人過淮招納丁未大閱張俊軍戊申以兵部侍郎胡世將爲四川安撫制置使二月戊午劉錡入見減建康府夏稅折輸錢蠲民戶逋租和市科調庚申日中有黑子以呂頤浩爲江東安撫制置大使兼行宮留守壬戌岳飛乞增兵不許癸亥帝發建康丙寅以胡安國春秋傳成書進寶文閣直學士戊寅帝至臨安己卯以戶部尚書章誼爲江東安撫制置大使兼行宮留守呂頤浩爲醴泉觀使甲申減紹興府

和市絹萬匹三月己丑以知南外宗正事仲儒嗣濮王  
庚寅以禮部尚書劉大中參知政事兵部尚書王庶爲  
樞密副使壬辰復以秦檜爲尚書右僕射同中書門下  
平章事兼樞密使甲午陳與義罷戊戌增夔州路路分  
都監一員脩治關隘練義兵己亥蠲農器及牛稅以李  
天祚爲靜海軍節度使交趾郡王壬寅定以故相韓忠  
彥配享徽宗廟廷丁未蠲所過州縣民積欠稅賦戊申  
蠲江西湖南諸州月椿錢各萬緡己酉命考覈川陝宣

撫司便宜所授官冒濫尤甚者悉與裁減夏四月庚申初置戶部和糴場于臨安壬戌遣王庶巡視江淮邊防丁丑復置六路發運司癸未詔三衙管軍輪宿禁中五月庚戌詔鎮江府募橫江軍千人竄內侍羅亶于海島庚子禁貧民不舉子其不能育者給錢養之壬寅貶劉子羽爲單州團練副使漳州安置丁未金國使烏陵思謀石慶充與王倫等偕來戊申以資政殿學士葉夢得烏江東安撫制置大使己酉王庶至淮南檄張宗顏將

兵七千屯廬州巨師古三千屯太平州分韓世忠軍屯  
泗州及天長縣六月壬戌賜衍聖公孔玠衢州田五頃  
奉先聖祠事癸亥趙鼎上重修哲宗實錄壬申賜禮部  
進士黃公度以下三百九十五人及第出身王庶自淮  
南還入見乙亥以中護軍統制張宗顏知廬州命劉錡  
率兵移屯鎮江府丁丑烏陵思謀石慶充入見秋七月  
乙酉朔復命王倫及藍公佐奉迎梓宮錄司馬光曾孫  
伋補承務郎辛亥彗出東方八月戊午詔日者遣使報

聘鄰國期還梓宮尚慮邊臣未諭遂弛戎備以疑衆心  
其各嚴飭屬城明告部曲臨事必戒無忘捍禦甲子蠲  
江東路月椿錢萬三千緡有奇丁丑尋滅遣監察御史  
李察宣諭江西措置盜賊冬十月丁巳劉大中罷甲戌  
趙鼎罷乙亥日中有黑子丁丑金國使張通古蕭哲與  
王倫偕來韓世忠乞奏事行在不許戊寅樞密副使王  
庶乞免簽書和議文字累疏求去不許十一月甲申以  
翰林學士承旨孫近參知政事丙戌遣大理寺丞薛悰

朱斐詣廣南路決滯獄戊戌王倫入見己亥復以倫爲國信計議使中書舍人蘇符副之符辭以疾庚子以孫近兼權同知樞密院事辛丑詔金國遣使入境欲朕屈己就和命侍從臺諫詳思條奏從官張燾晏敦復魏矼曾開李彌遜尹焞梁汝嘉樓炤蘇符薛徽言御史方廷實皆言不可甲辰王庶罷辛亥以樞密院編修官胡銓上書直諫斥和議除名昭州編管壬子改差監廣州都鹽倉十二月甲寅以趙鼎爲醴泉觀使乙卯以宗正少

卿馮繼爲國信計議副使己未以吏部尚書李光參知政事戊辰王倫言金使稱詔諭江南其名不正秦檜以未見國書疑爲封冊帝曰朕嗣守祖宗基業豈受金人封冊癸酉館職胡珵朱松張擴凌景夏常明范如圭上書極論不可和甲戌以端明殿學士韓肖胄簽書樞密院事乙亥命肖胄等爲金國奉表報謝使丙子張通古蕭哲至行在言先歸河南地徐議餘事以監察御史施廷臣爲侍御史權吏部尚書張燾侍郎晏敦復以廷臣

主和議而升用執奏不行御史中丞勾龍如淵右諫議大夫李誼殿中侍御史鄭剛中凡再至都堂及宰執議取國書丁丑詔金國使來盡割河南陝西故地通好于我許還梓宮及母兄親族餘無需索令尚書省榜諭庚辰帝不御殿以方居諒陰難行吉禮命秦檜攝冢宰受書以進是月虛恨蠻犯嘉州忠鎮砦是歲始定都于九年春正月壬午朔帝在臨安丙戌以金國通和大赦河南新復州軍官吏並不易置蠲其民租稅三年徭役

五年以王倫同簽書樞密院事充奉護梓宮迎請皇太后交割地界使戊子遣判大宗正事士儀兵部侍郎張燾詣河南修奉陵寢庚寅賜劉光世號和衆輔國功臣張俊加少傅安民靖難功臣韓世忠爲少師張浚復左宣奉大夫辛卯以尹焞爲徽猷閣待制提舉萬壽觀兼侍讀焞力辭不拜壬辰加岳飛吳玠並開府儀同三司楊沂中太尉癸巳建皇太后宮甲午金宿州守臣趙榮來歸丙申金主詔諭河南諸州以割地歸我之意改發

運經制司爲經制司命戶部長貳一人領使仍置副或  
判官戊戌以王倫爲東京留守郭仲荀爲副戶部侍郎  
梁汝嘉兼江淮荆浙閩廣路經制使司農卿霍蠡爲判  
官己亥以吳玠爲四川宣撫使二月癸丑以徽猷閣待  
制周聿爲陝西宣諭使監察御史方廷實宣諭三京淮  
北丁巳以郭仲荀爲太尉東京同留守慕洧寇環州戊  
午以知金州郭浩爲陝西宣撫判官壬戌以李綱爲湖  
南路安撫大使張浚知福州尋復資政殿大學士爲福

建路安撫大使命周聿方廷實蒐訪隱士甲子均定諸州縣月椿錢己巳以郭浩爲陝西宣諭使壬申命修徽宗實錄癸酉詔盜賊已經招安而復嘯聚者發兵加誅母赦是月日中有黑子月餘乃沒江西統制官李貴以其軍歸揚沂中三月丁亥以和州防禦使璩爲保大軍節度使封崇國公丙申王倫受地于金得東西南三京壽春宿亳曹單州及陝西京西之地烏珠還祁州己亥分河南爲三路廢拱州辛丑以翰林學士樓炤簽書樞

密院事甲辰僞齊知開封府鄭億年上表待罪召赴行  
在丁未正僞齊所改州縣名是春夏人陷府州夏四月  
庚戌朔呂頤浩薨辛亥命樓炤宣諭陝西諸路壬午金  
鄜延路經畧使關師古上表待罪命知延安府癸丑落  
趙鼎奉國軍節度使爲特進仍知泉州金陝西諸路節  
制使張中孚上表待罪命爲檢校少保寧國軍節度使  
知永興軍節制陝西諸路軍馬甲子以觀文殿學士孟  
庾爲西京留守資政殿學士路允迪南京留守丙寅金

秦鳳經略使張中彥上表待罪命知渭州以孫近兼權  
同知樞密院事壬申移壽春府治淮北舊城癸酉詔新  
復諸路監司帥臣按劾官吏之殘民者韓世忠張俊入  
見五月庚寅奉迎東京欽先孝思殿累朝御容赴臨安  
辛卯復命江淮守臣二年爲任乙未復置淮東提舉茶  
鹽司癸卯復召募耆長法丙午鄜延副將李世輔部兵  
三千自鳳翔來歸賜名顯忠六月庚戌皇后邢氏崩于  
五國城辛亥夏國主乾順卒壬子樓炤以東京見卒四

千四百人爲忠銳三將庚申盜入邵武軍壬戌以新復州縣官吏懷不自安降詔開諭己巳吳玠薨壬申樓炤承制以李顯忠爲護國軍承宣使樞密行府前軍都統制率部兵及夏國招撫使王樞赴行在癸酉澧州軍事推官韓紂坐上書論講和非計送循州編管乙亥以孟庾兼東京留守王倫自東京赴金國議事樓炤承制以楊政爲熙河經略使吳璘爲秦鳳經略使仍並聽四川宣撫司節制郭浩爲鄜延經略使同節制陝西軍馬丙

子分宣撫司兵四萬人出屯熙泰六千人隸郭浩留吳玠精兵二萬人屯興元府興洋二州戊寅置錢引務于永興軍是月撫州鈴轄伍俊謀據桃源復叛湖北安撫薛弼召誅之秋七月甲申以文臣爲新復諸縣令丙戌東京耆老李茂松寇璋等二百人奉表稱賀皆引見補官遣還復置都水南北丞各一員丁亥金人拘王倫于中山丙申命詳驗劉豫僞官換給告身乙巳給還僞齊所沒民間資產以胡世將兼權主管四川宣撫司八月

己酉復淮南諸州學官庚戌賜陝西諸軍冬衣絹十五  
萬匹命前川陝宣撫司便宜所補官限一年自陳換給  
告身丙辰金國以撻懶主和割地疑其二心殺之壬戌  
蠲成都潼川路歲輸對糴等米五十四萬石水運錢七  
十九萬緡乙丑給新法度牒紫衣師號錢二百萬緡付  
陝西省軍儲己巳命陝西復行鐵錢庚午遣蘇符等使  
金賀正旦乙亥遣前知宿州趙榮知壽州王威俱還金  
國以關師古爲行營中護軍前軍統制九月己卯命鄜

延秦鳳熙河路招納蕃部熟戶及陷沒夏國軍民丙戌  
封叔士儻爲齊安郡王庚寅罷經制司令提刑兼領常  
平事甲午名皇太后殿曰慈寧丙申以威州防禦使溫  
濟告韓世忠陰事勒停南建州編管世忠又奏欲殺之  
詔移萬安軍己亥郭仲荀率東京兵五千至鎮江冬十  
月辛亥詔侍從官各舉所知二人王倫見金主于御林  
子被拘于河間遣其副藍公佐先歸甲寅王樞入見併  
其俘百九十人皆縱遣還夏國己未蠲階成岷鳳四州

民稅之半戊辰慈寧宮成甲戌日中有黑子丙子賜李顯忠軍錢十萬緡是月岳飛入見十一月戊寅朔賜吳玠家錢三萬緡以其弟璘爲龍神衛四廂都指揮使申命刑部大理官編次刑名斷例癸未嗣濮王仲儒薨己丑詔三省官屬詳覆在京通用今追復張所爲直龍圖閣十二月甲寅命續編紹興因革禮甲子李光罷戊辰命續修元豐會要烏珠留蘇符等于東京謀復取河南十年春正月丙戌遣莫將等充迎護梓宮奉迎兩宮使

辛卯李綱薨甲辰以顯謨閣直學士提舉醴泉觀鄭億  
年復資政殿學士奉朝請二月戊申命陝西復募蕃漢  
弓箭手詔贓吏罪抵死情犯甚者奏取旨辛亥雨雹以  
劉錡爲東京副留守李顯忠南京副留守壬子命兩宗  
正官各舉所知宗室二人癸丑展省試期一年壬戌詔  
新復州軍蒐舉隱逸諸路經理屯田丁卯罷史館以日  
歷歸祕書省置監修國史官以孟庚知開封府爲東京  
留守仇悆知河南府西京留守癸酉罷吏部審量宣和

濫賞三月甲申封閻伯爲商丘宣明王戊子增印錢引  
五百萬緡付宣撫司市軍儲川陝宣撫副使胡世將屢  
言金人必渝盟宜爲備己丑罷諸路增置稅場韓世忠  
張俊入見始罷內教復營建康行宮丙申蘇符自東京  
還丁酉命川陝宣撫司軍事不及待報者聽隨宜措置  
己亥以郭浩知永興軍兼節制陝西諸路軍馬楊政徙  
知興元府是月命胡世將與夏人議入貢夏人不報夏  
四月丙午訪求亡逸歷書及精於星歷者辛酉以張中

孚爲醴泉觀使中彥提舉祐聖觀趙彬爲兵部侍郎癸  
亥命部使者歲舉廉吏一人庚午復四川諸州學官壬  
申韓肖胄罷五月己卯金人叛盟烏珠等分四道來攻  
甲申名徽宗御制閣曰敷文乙酉烏珠入東京留守孟  
庾以城降知興仁府李師雄知淮寧府李正民及河南  
諸州繼降丙戌金人陷拱州守臣王慥死之薩里罕自  
河中趨永興軍陝西州縣官皆降丁亥金人陷南京留  
守路允迪降劉錡引兵至順昌府己丑金人陷西京留

守李利用副總管孫暉皆棄城走鈴轄李興率兵拒戰  
不克辛卯胡世將自河池遣涇原經略使田晟以兵三  
千人迎敵金人京湖宣撫司忠義統領李寶敗金人于  
興仁府境上癸巳知亳州王彥先叛降于金金人陷永  
興軍趨鳳翔丁酉命胡世將移陝西之石護軍還屯蜀  
口以福建廣東盜起命兩路監司出境共討己亥命劉  
光世爲三京招撫處置使以援劉錡庚子以吳璘同節  
制陝西諸路軍馬聽胡世將便宜黜陟處置軍事辛丑

金人犯鳳翔府之石壁砦吳璘遣統制姚仲等拒郤之  
金人圍耀州郭浩遣兵救之金兵解去壬寅金人圍順  
昌府三路都統葛王襄以大軍繼至劉錡力戰敗之六  
月甲辰朔以韓世忠太保張俊少師岳飛少保並兼河  
南北諸路招討使乙巳劉錡遣將閻充戰敗金人于順  
昌之李村丙午命兩浙江東福建諸州團結弓弩手以  
仇悆爲沿海制置使詔將佐士卒能立奇功者賞以使  
相節鉞官告臨軍給受丁未罷建康府行宮營繕戊申

以劉錡爲沿海制置使己酉吳璘遣統制李師顏等戰  
敗金人于扶風拔之壬子烏珠及宋叛將孔彥舟鄆瓊  
趙榮等帥衆十餘萬攻順昌府劉錡率將士殊死戰大  
敗之初秦檜奏命錡擇利班師錡不奉詔戰益力遂能  
以寡勝衆乙卯順昌圍解烏珠還以知平江府梁汝嘉  
兼浙西沿海制置使丙辰岳飛將牛皋及金人戰于京  
西敗之己未劉光世進軍和州郭浩遣統制鄭建亢攻  
破金人于醴州復其城壬戌詔諸司錢物量留經費外

悉發以贍軍樓炤以父喪去位甲子薩里罕攻青谿嶺  
鄜延經略使王彥率兵戰敗之薩里罕還屯鳳翔命士  
儂主奉漢王祠事張俊遣左護軍都統制王德援劉錡  
德暫至順昌值圍已解復還廬州遣司農少卿李若虛  
詣岳飛軍諭指班師飛不聽丙寅下詔撫諭順昌府官  
吏兵民庚午以劉錡爲武泰軍節度使侍衛馬軍都虞  
候韓世忠遣統制王勝背嵬將成閔率兵至淮陽軍南  
與金人遇擊敗之是月金人圍慶陽府權守臣宋萬年

固守金人不能下岳飛領兵援劉錡與金人戰于蔡州  
敗之復蔡州閏月癸酉朔張俊遣統制宋超敗金人于  
永城縣朱家村甲戌追孟庾路允迪官徙家屬遠郡丙  
子詔三衙管軍及觀察使已上各舉智略勇猛材堪將  
帥者二人金人犯涇州守臣曲汲棄城去經略使田晟  
率兵來救金人敗走甲申晟及金人再戰于涇州敗之  
金人引歸鳳翔乙酉降陝西雜犯死罪釋流以下囚丙  
戌以胡世將爲端明殿學士吳璘爲鎮西節度使楊政

武當節度使郭浩奉國節度使王德攻金人于宿州夜  
破之降其守馬秦丁亥詔釋順昌府流以下囚再復租  
稅二年守禦官吏進官一等己丑永興軍鈐轄傅忠信  
等與金人戰于華陰縣敗之壬辰岳飛遣統制張憲擊  
金將韓常于潁昌府敗之復潁昌丙申張憲復淮寧府  
丁酉趙鼎分司興化軍居住岳飛遣統制郝最等與金  
人戰于鄭州北復鄭州李興復汝州與金人戰于河清  
縣敗之復伊陽等八縣李成遁去韓世忠遣統制王勝

王權攻海州克之執其守王山戊戌張俊率統制宋紹  
等及王德兵會于城父縣酈瓊及葛王襄遁去遂復毫  
州己亥金人救海州王權等逆戰敗之復懷二縣庚子  
張俊棄亳州引軍還壽春再貶趙鼎漳州居住又貶清  
遠軍節度副使潮州安置秋七月癸卯岳飛遣將張應  
韓清入西京會李興復永安軍丙午以御史中丞王次  
翁參知政事己酉岳飛及烏珠戰于郾城縣敗之庚戌  
曲赦海州永興軍統領辛鎮及金人戰于長安城下敗

之癸丑以楊沂中爲淮北宣撫副使劉錡爲判官甲寅  
岳飛遣統制楊再興王蘭等擊金人于小商橋皆戰死  
乙卯金人攻潁昌岳飛遣將王貴姚政合兵力戰敗之  
壬戌飛以累奉詔班師遂自郾城還軍皆潰金人追之  
不及潁昌蔡鄭諸州皆復爲金有甲子以釋奠文宣王  
爲大祀乙丑增收州縣頭子錢爲激賞費金人圍淮寧  
府趙秉淵棄城南歸辛未金人犯藍厔縣王俊逆戰于  
東洛谷郤之八月壬申朔以張九成喻樗鄭剛中凌景

夏樊光遠毛叔度元盥等七人嘗不主和議皆降黜之  
乙亥韓世忠圍淮陽軍不克庚辰金人及鄜瓊合兵駐  
於千秋湖陵韓世忠遣統制劉寶等夜襲破之壬午李  
成犯西京李興擊郤之楊沂中軍于宿州丙戌以郭浩  
知夔州丁亥楊沂中自宿州夜襲柳子鎮軍潰遂自壽  
春府渡淮歸金人屠宿州甲午川陝宣撫司統領王喜  
等遇金人于沂陽縣敗之九月壬寅朔遣趙居舍人李  
易諭韓世忠罷兵時秦檜專主和議諸大帥皆還鎮丁

未楊政遣統制楊從儀夜襲金人于鳳翔府敗之戊申  
金人復入西京李興棄城去庚戌合祀天地于明堂大  
赦辛酉臨安火戊辰以郭浩知金州節制陝西河東軍  
馬兼措置河東忠義軍是秋知代州王忠植舉兵復石  
代等十一州冬十月癸酉復張浚觀文殿大學士甲戌  
以王忠植爲建寧軍承宣使河東路經略安撫使戊寅  
秦檜上重修紹興在京通用敕令格式庚辰金人犯慶  
陽府守臣宋萬年以城降辛卯金人犯陝州吳琦率兵

迎擊敗之庚子金人襲洮州攻鐵城堡統制孔文清惠  
逢擊敗之是月劉錡入見胡世將命王忠植救慶陽叛  
將趙惟清執之降于金忠植不屈而死十一月丁未金  
將合喜復犯陝州吳琦擊郤之又犯寶雞縣統制楊從  
儀敗之壬子以令應爲保寧軍節度使是月宜章洞民  
駱科叛犯桂陽郴道連賀諸州命發大兵討之十二月  
壬午上皇太后冊寶于慈寧殿丁亥贈王忠植奉國軍  
節度使謚義節辛卯起諸路耆長役錢隸總制司專給

軍用是月楊沂中引兵還行在

十一年春正月癸卯鳳翔統制楊從儀敗金人于渭南  
庚戌張浚入見乙卯金人犯壽春府守臣孫暉統制雷  
仲合兵拒之丁巳壽春陷暉仲棄城去己未劉錡自太  
平州率兵二萬援淮西庚申金人渡淮辛酉雨雹乙丑  
劉錡至廬州還丙寅兀术陷廬州戊辰金人陷商州守  
臣邵隆棄城去己巳命楊沂中引兵赴淮西岳飛進兵  
江州二月癸酉張浚遣王德渡江屯和州金人退屯昭

開邵隆破金人于洪門復南商乙亥金人復來爭和州  
張俊敗之命韓世忠以兵援淮西丙子趣岳飛會兵斬  
黃王德等敗金人于含山縣東己卯統制關師古李橫  
擊敗金人于巢縣復之庚辰岳飛發鄂州辛巳知泰州  
王旼兼通泰二州制置使癸未王德田師中等擊破金  
人復舍山縣奪昭關劉錡自東關擊敗金人于青谿甲  
申金人復犯昭關王德等又敗之李顯忠遣統領崔臯  
擊敗金人于舒城縣丁亥楊沂中劉錡等大敗烏珠軍

于柘臯己丑烏珠親率兵逆戰于店步沂中等又敗之乘勝逐北遂復廬州是月虔吉州盜賊悉平三月庚子朔張俊進鬻田及賣度牒錢六十三萬緝助軍用壬寅韓世忠引兵趨壽春癸卯復張俊特進金人圍濠州岳飛發舒州甲辰張俊楊沂中劉錡議班師乙巳沂中錡先行俊以輕兵留後丙午詔釋淮西雜犯死罪以下囚丁未金人陷濠州執守臣王進夷其城鈐轄邵青死之戊申張俊遣楊沂中王德入濠州遇金伏兵敗還己酉

韓世忠至濠州不利而退辛亥岳飛次定遠縣聞金兵  
退還屯舒州楊沂中歸行在壬子金人渡淮北歸癸丑  
張浚歸建康府丁巳劉錡歸太平州甲子行營統制張  
彥及金人遇于汎陽之劉坊砦第八將張宏戰沒夏四  
月丙子復收免行錢己卯孫近罷辛巳以王次翁兼權  
同知樞密院事韓世忠張浚岳飛相繼入覲壬辰以世  
忠俊並爲樞密使飛樞密副使命三省樞密院官復分  
班奏事乙未張浚請以所部兵隸御前罷三宣撫司改

統制官爲御前統制官各屯駐舊所丙申以廣西經略使胡舜陟節制廣東湖南兵趣討駱科慕洧破新泉砦又攻會州將官朱勇破之五月辛丑置兩淮江東西湖廣京西三道總領軍馬錢糧官仍掌報發御前軍馬文字癸卯轉恤戰沒將士丁未遣張俊岳飛于楚州巡視邊防召劉光世赴行在甲寅命樞密行府置司鎮江令徧行巡歷措置庚申加楊沂中檢校少保開府儀同三司六月乙亥造剋敵弓加秦檜特進進尚書左僕射同

中書門下平章事兼樞密使癸未張俊岳飛至楚州俊  
以海州城不可守毀之遷其民統韓世忠軍還鎮江惟  
背嵬一軍赴行在甲申知河南府李興部兵至郢州以  
興爲左軍統制乙丑明州僧王法恩等謀反伏誅壬辰  
劉光世罷爲萬壽觀使秋七月戊戌秦檜上徽宗實錄  
進修撰以下各一官庚子以翰林學士范同叅知政事  
以旱減膳祈禱遣官決滯獄出繫囚丁未加秦檜少保  
甲寅罷劉錡兵命知荆南府乙卯詔優獎永興鳳翔秦

龍等州縣官到任半年減磨勘任滿遷一官已未加張俊太傅癸亥大雨是月命張俊復如鎮江措置軍務留岳飛行在八月戊辰立祚德廟于臨安祀韓厥甲戌罷岳飛乙亥命諸王後各推年長一人權主祀事癸巳胡世將起復九月癸卯命軍器少監鮑琚如郢州根括宣撫司錢穀郢州前軍副統制王俊告副都統制張憲謀據襄陽爲變張俊收憲屬吏以聞丁未坐監司不按贓吏罪辛亥吳璘拔秦州州將武誼降壬子璘率姚仲及

金人戰于丁劉園敗之楊政克隴州破岐下諸屯郭浩  
復華州入陝州甲寅建康大火丙申遣劉光遠等充金  
國通問使吳璘及金人戰于剡家灣大敗之遂圍臘家  
城癸亥璘自臘家城受詔班師楊政郭浩皆引軍還乙  
丑邵隆復虢州郝最討禽駱科斬之冬十月丙寅朔金  
人陷泗州遂陷楚州丁卯命樞密都承旨鄭剛中宣諭  
川陝戊辰楊政及金人戰于寶雞縣敗之禽通檢貝勒  
乙亥烏珠遣劉光遠等還戊寅詔修玉牒下岳飛張憲

大理獄命御史中丞何鑄大理卿周三畏鞫之壬午遣  
魏良臣王公亮爲金國稟議使乙酉虛恨蠻主歷階詣  
嘉州降癸巳韓世忠罷爲醴泉觀使封福國公是月金  
人陷濠州邵隆復陝州十一月己亥范同罷責降李光  
爲建寧軍節度副使滕州安置辛丑烏珠遣審議使蕭  
毅邢其瞻與魏良臣等偕來丁未范同分司筠州居住  
罷判大宗正事士儼同知宗正事士撙申嚴戚里宗室  
謁禁己酉雷壬子蕭毅等入見始定議和盟誓乙卯以

何鑄簽書樞密院事充金國報謝進誓表使庚申命宰  
執及議誓撰文官告祭天地宗廟社稷辛酉以張浚爲  
檢校少傅崇信軍節度使萬壽觀使是月與金國和議  
成立盟書約以淮水中流畫疆割唐鄆二州界之歲奉  
銀二十五萬兩絹二十五萬匹休兵息民各守境土詔  
川陝宣撫司毋出兵生事招納叛亡駱科餘黨歐幻四  
等復叛桂陽藍山犯平陽縣遣江西兵馬都監程師回  
討平之十二月丁卯責降徽猷閣待制劉洪道爲濠州

團練副使柳州安置癸酉命尚書省置籍勾考諸路滯  
獄甲戌罷川陝宣撫司便宜行事乙亥烏珠遣何鑄等  
如會寧見金主且趣割陝西餘地遂命周聿莫將鄭剛  
中分畫京西唐鄧陝西地界壬午命州縣三歲一置產  
業部籍民貲財田宅以定賦役禁受賕虧隱舊額丁亥  
立譏察海舶條法癸巳賜岳飛死于大理寺斬其子雲  
及張憲于市家屬徙廣南官屬於鴻等論罪有差

宋史卷二十九

欽定四庫全書

史部  
卷五十六

宋史卷三十

元中書右丞相總裁托克托等修

本紀第三十

高宗七

十二年春正月癸卯罷樞密行府庚申孫近分司漳州  
居住二月丁丑加建國公瑗爲檢校少保進封善安郡  
王己卯賜楊沂中名存中丙戌詔諸州修學宮辛卯蠲

廣南東西路駱科殘擾州縣今年租鎮江太平池州蕪  
湖大火癸巳金主許歸梓宮及皇太后遣何鑄等還三  
月丙申臨安府火壬寅命普安郡王出就第朝朔望辛  
亥以士儂嘗營護岳飛爲朋比責建州居住丙辰胡世  
將卒夏四月甲子朔遣孟忠厚爲迎護梓宮禮儀使王  
次翁爲奉迎兩宮禮儀使丁卯皇太后偕梓宮發五國  
城金遣完顏宗賢劉珣護送梓宮高居安護送皇太后  
庚午賜禮部進士陳誠之以下二百五十四人及第出

身戊寅封韋淵平樂郡王辛巳皇后邢氏崩訃初至甲  
申增修臨安府學爲太學五月甲午以鄭剛中爲川陝  
宣撫副使乙未遣審詔遠等賀金主生辰置淮西京西  
陝西諸路榷場丙午增築慈寧殿停給度僧牒乙卯復  
試教官法六月甲子命侍從臺諫禮官雜議權奉攢宮  
戊辰以方俟高爲攢宮按行使辛未責降王庶爲嚮德  
軍節度副使道州安置壬午金國歸孟庚李正民甲申  
以吳璘爲檢校少師階成岷鳳四州經略使秋七月壬

辰朔福州簽判胡銓除名新州編管丁酉上皇后諡曰  
懿節祔神主于別廟己亥以何鑄兼權參知政事己酉  
始製常行儀仗及造玉輶乙卯蠲廣南湖北沿邊州軍  
免行錢八月辛酉朔烏珠使來求商州及和尚方山二  
原丙寅何鑄罷甲戌以万俟高參知政事充金國報謝  
使壬午皇太后至入居慈寧宮己丑帝易總服奉迎徽  
宗及顯肅懿節二后梓宮至奉安于龍德別宮是月鄭  
剛中分畫陝西地界割商秦之半畀金國存上津豐陽

天水三縣及隴西成紀餘地棄和尚方山二原以大散  
關爲界九月乙未以孟忠厚爲樞密使充攢宮總護使  
壬寅大赦乙巳加秦檜太師封魏國公丙午金使劉筭  
完顏宗表等九人入見戊申以王次翁等充全國報謝  
使藏全國誓書于內侍省辛亥加張中孚開府儀同三  
司中彥靖海軍節度使甲寅杖殺僞福國長公主李善  
靜以金州郭浩爲金房開達四州經略安撫使始遣楊  
愿使金賀正旦冬十月乙丑始聽中外用樂丙寅權攢

徽宗皇帝及顯肅皇后于會稽永固陵懿節皇后祔乙亥以翰林學士陳克俊簽書樞密院事權參知政事丁丑以皇太后回鑾推恩進封秦檜爲秦魏兩國公辭不拜庚辰以何鑄黨援岳飛不主和議責授祕書少監徽州居住甲申皇太后生辰上壽于慈寧宮丁亥置福建路提舉茶司事十一月癸巳樞密使張浚罷進封清河郡王以左司郎中李椿年爲兩淮轉運副使專治經界乙未加楊存中少保己亥禁貶謫人私至行在庚子作

崇政垂拱二殿辛丑劉光世薨壬寅曾祖姑秦魯國大長公主薨丙午尹焞卒庚戌孟忠厚罷左承事郎張戒坐黨趙鼎岳飛停官辛亥遣張中孚中彥還金國十二月甲子詔侍從監察御史已上監司郡守各舉所知宗室丙寅幸秦魯國大長公主第臨奠又幸劉光世第臨奠庚午命太學弟子員以三百人爲額壬申秦檜上六曹寺監通用敕令格式癸酉以李顯忠爲保信軍節度使御前選鋒軍統制王進爲御前諸軍都統制是歲斷

大辟二十四人

十三年春正月戊戌加上徽宗謚曰體神合道駿烈遜  
功聖文仁德憲慈顯孝皇帝己亥親饗太廟奉上冊寶  
癸卯增建國子監太學乙巳復兼試進士經義詩賦二  
月壬戌初御前殿特引四參官起居甲子製郊廟社稷  
祭器乙丑更永固陵曰永祐丙寅封韓世忠咸安郡王  
乙亥蠲雷化等十州免行錢丙子造金象革木四輶庚  
辰立太學及科舉試法辛巳秘書少監秦煒修建炎以

來日歷成乙酉建景靈宮奉安累朝神御三月己亥造  
齒簿儀仗乙巳建社稷壇丙午築圜丘振淮南饑民仍  
禁遏糴夏四月癸亥頒鄉飲酒儀于郡國甲戌毀獄吏  
訊囚非法之具閏月己丑立貴妃吳氏爲皇后戊申命  
史館編靖康建炎忠義錄庚戌楊政入見加檢校少保  
賜田五十頃壬子蠲諸路無名月椿錢乙卯王次翁罷  
五月甲子張九成坐黨趙鼎南安軍居住壬申置國子  
博士正錄乙亥命諸路置放生池丁丑天申節始上壽

錫宴如故事六月壬戌禁三衙及諸軍市易月增將官  
供給錢有差壬寅程克俊罷以方侯禹兼權簽書樞密  
院事戊申詔諸路提刑歲舉部內廉明平恕獄官庚戌  
金遣洪皓張邵朱弁來歸秋七月甲子詔求遺書罷捕  
賊補官格丙寅處州兵士楊興等謀作亂事覺伏誅戊  
辰置諸州銅作務壬申雨雹蠲浙西貧民逋負丁鹽錢  
八月丙戌遣吏部侍郎江邈奉迎累朝神御于溫州丁  
亥命諸路有出身監司一員提舉學事戊戌洪皓至自

金國入見己亥遣鄭朴等使金賀正旦王師心等賀金  
主生辰鄭剛中獻黃金萬兩辛丑廢昌化萬安吉陽軍  
知階州田晟將所部三千人赴行在丁未以晟主管侍  
衛馬軍司公事其衆隸焉己酉加錢恆太尉庚戌詔監  
司守臣講求恤民事宜九月丁巳宗室子偁卒于秀州  
甲子洪皓出知饒州戊辰命諸路置敦宗院己巳詔淮  
東京西監司歲終上州縣所增戶口爲守令殿最庚午  
以兵部侍郎司馬朴死節贈兵部尚書賜其家銀絹癸

西詔諸州守貳提舉學事縣令佐主管學事戊寅蠲淮  
南逋欠坊場錢及上供帛冬十月己丑秦檜上監學敕  
令格式庚寅製渾天儀乙未奉安累朝帝后神御于景  
靈宮十一月庚申日南至合祀天地于圜丘太祖太宗  
並配大赦十二月癸未朔日食雲陰不見辛卯毀私鑄  
毛錢癸巳建秘書省丁酉增太學弟子員二百己亥郭  
浩入見丁未命行在宗子入宮學己酉金遣完顏曄等  
來賀明年正旦是月始頒來歲歷于諸路監司守臣是

歲闋外初行營甲

十四年春正月丁巳遣羅汝楫等報謝金國甲子臨安府火戊寅命普安郡王爲子偁解官持服二月丁亥復置靖州新民學癸巳蠲江浙諸路逋欠錢帛戊戌初命四川都轉運司歲撥總制司錢百七十三萬緡市紬絹綿輸于郢州總領所丙午罷万俟卽定宗學生額爲百員己酉以資政殿學士樓炤簽書樞密院事兼權參知政事加郭浩檢校少保三月乙卯蠲江浙京湖積欠上

供錢米丁卯避金太祖嫌名改岷州爲西和州川陝宣撫司爲四川宣撫司己巳幸太學蠲汀漳泉建四州經賊殘蹂民戶賦役一年壬申解潛坐黨趙鼎責授濠州團練副使南安軍安置己卯詔舉賢良夏四月甲申詔刑部及監司決絕滯訟丁亥初禁野史虔州民析其屋朽柱中有文曰天下太平年甲午金人來求淮北人之在南者詔願者聽還遣馬軍司統領張守忠討海賊朱明五月丙辰詔階成西和鳳四州募兵赴行在甲子樓

炤罷乙丑以御史中丞李文會簽書樞密院事兼權參  
知政事丙寅婺州大水已巳金始遣烏延和等來賀天  
申節辛未楚州鹽城縣海水清是月嚴信衡建四州水  
六月甲申蠲江浙州縣酒稅坊場綱運倉庫積年逋負  
孫近再奪三官移南安軍居住丁亥加高世則少保戊  
子安南國入貢癸巳宣州涇縣妖賊俞一作亂守臣捕  
滅之乙未振江浙福建被水之民丙申內侍白鄂坐誹  
謗及其客張伯綸俱黥配吉陽軍特贈子偁太子少師

官給葬事庚子奪万俟高三官歸州居住乙巳置國子  
監小學秋七月戊午金人殺王倫于河間府丙寅立明  
法科兼經法丙子幸秘書省八月癸未撫州獻瑞禾庚  
寅以李椿年權戶部侍郎仍治經界乙未遣林保使金  
賀正旦宋之才賀金主生辰九月辛酉分利州爲東西  
路以吳璘爲利州西路安撫使楊政利州東路安撫使  
甲子命郡守終更入見各舉所部縣令一人壬申趙鼎  
移吉陽軍安置癸酉命臨安府索蔡京子孫逮赴貶所

遇赦永不量移冬十月甲午從右正言何若言請戒內  
外師儒之官黜伊川程氏之學乙未加韋淵少師己亥  
以永道郴三州桂陽監及茶陵縣民多不舉子永蠲其  
身丁錢絹米麥十一月甲子復內教即禁中閱試三衙  
將士癸酉李光移瓊州安置乙亥朱勝非薨十二月丁  
丑朔潼川府路轉運判官宋蒼舒獻嘉禾一莖九穗己  
卯命諸郡收養老疾貧乏之民復置漏澤園葬死而無  
歸者丁酉李文會罷尋責筠州居住庚子以御史中丞

楊愿簽書樞密院事兼權參知政事癸卯金遣寧散溫等來賀明年正旦是月汀賊華齊寇漳州長泰縣安撫司遣兵捕之爲所敗將佐趙成等死之是歲四川宣撫司始取民戶稱提錢歲四十萬緡以備軍費

十五年春正月丁未朔御大慶殿初行大朝會禮戊申瀘南安撫使馮楫獻嘉禾已未分經義詩賦爲兩科取士辛酉初置籍田丁卯減成都府路對糴米三之一宣撫司激賞錢三十萬緡戊辰命戶部侍郎王鉄措置兩

浙經界辛未初命僧道納免丁錢二月戊寅增太學弟子員百人乙未詔州縣科折之數第三等戶毋或均配己亥封崇國公璩爲恩平郡王出就第三月甲子遣敷文閣待制周襟馬官國史愿諸將程師回馬欽白常皆還金國夏四月丙子朔賜秦檜第一區戊寅彗星出東方癸未避殿減膳命監司郡守條上便民事宜提刑巡行決獄賜禮部進士劉章以下三百人及第出身丁亥以彗出大赦癸巳彗沒甲午遣後軍統制張淵討捕福

建盜賊庚子罷四川都轉運司五月丙辰客星見戊午  
命貧民產子賜義倉米一斛甲子金遣完顏宗尹等來  
賀天申節六月乙亥朔日有食之丁丑幸秦檜第乙酉  
加檜妻婦子孫官封丁亥客星沒秋七月戊申復置利  
州鑄錢監戊午命監司審察縣令治狀顯著及老懦不  
職者上其名以爲黜陟蠲廬光二州上供錢米一年丁  
卯免汀漳二州秋稅及處州三縣被水民家紬絹鄂州  
舊額絹各一年己巳蠲四川轉運司積貸常平錢十三

萬縉八月甲戌朔禁收折帛令零錢止輸實數乙亥蠲  
京西路請佃田租及州縣場務稅錢二年己亥改諸路  
提舉茶鹽官爲提舉常平茶鹽公事川廣以憲臣兼領  
辛丑復增太學弟子員二百九月辛酉遣錢周林使金  
賀正旦嚴抑賀金主生辰冬十月乙亥帝書一德格天  
之閣賜秦檜仍就第賜宴丙子楊愿罷癸未以樞密都  
承旨李若谷簽書樞密院事兼權參知政事武岡軍猺  
人楊再興降庚寅以翰林學士承旨秦嬉爲資政殿學

士提舉萬壽觀兼侍讀恩數視執政辛卯夜雷發已蠲  
安豐軍上供錢米二年甲午以汪勃言折彥質黨趙鼎  
柳州安置庚子置四川宣撫司總領錢糧官辛丑命秦  
嬉班簽書樞密之下十一月甲辰加錢忱少保錢恤開  
府儀同三司丙辰郭浩卒丙寅全給秦檜歲賜公使錢  
萬緡閏月己卯罷明法新科十一月戊午置江陰軍市  
舶務甲子命右司員外郎李朝正同措置經界丁卯金  
遣富察說等來賀明年正旦

十六年春正月戊子增太學外舍生額至千人壬辰親  
饗先農于東郊行籍田禮執耒耜九推詔告郡縣二月  
辛丑割金州豐陽縣洋州乾祐縣界金人壬寅毀諸路  
淫祠癸丑建秦檜家廟三月庚午朔建武學置弟子員  
百人辛卯造秦檜家廟祭器乙未增建太廟己亥立淮  
東江東兩浙湖北州縣歲較營田賞罰格夏四月壬子  
禁州縣預借民稅及和買錢戊午定選試武士弓馬去  
留格五月壬申濬運河命諸路漕臣兼提舉學事癸未

初作太廟祏室丙戌作景鐘丁亥金遣烏庫哩海等來  
賀天申節六月安南獻馴象十秋七月壬申以張浚上  
疏論時事落節鉞連州居住壬辰立秘書省獻書賞格  
丙申復何鑄爲端明殿學士兼侍讀八月辛丑築高襟  
壇壬子遣邊知白使金賀正旦周執羔賀金主生辰九  
月甲戌命何鑄等爲金國祈請使請國族甲午賞統制  
張淵韓京等討捕福建廣東諸盜功各進官有差冬十  
月戊戌帝觀新作禮器于射殿撞景鐘奏新樂十一月

丙子合祀天地于圜丘大赦庚辰罷州縣新辦稅場癸  
未復置御書院己丑加潘正夫少保十二月戊戌彗見  
西南方乙巳滅辛酉金遣盧彥倫等來賀明年正旦  
十七年春正月己巳命諸路收試中原流寓士人己卯  
禁監司郡守進羨餘辛卯以舉人多冒貫命州縣每三  
歲行鄉飲酒禮以貢士壬辰以李若谷參知政事御史  
中丞何若簽書樞密院事癸巳進奏燝爲資政殿大學  
士二月乙巳親祠高禩辛酉李若谷罷三月乙亥何若

罷己卯以翰林學士段拂參知政事乙酉改封秦檜爲  
益國公戊子改命張俊爲靜江寧武靖海軍節度使韓  
世忠鎮南武安寧國軍節度使落李若谷資政殿學士  
江州居住夏四月丙申蠲諸路免行錢三之一己亥以  
御史中丞汪勃簽書樞密院事己未詔趙鼎遇赦永不  
檢舉以前貶所潮州錄事參軍石慥待遇鼎厚除名潯  
州編管五月甲子詔舉賢良乙丑雨雹己巳洪皓責濠  
州團練副使英州安置辛巳金遣完顏卞等來賀天申

節六月乙卯禁招安盜賊戊午改命普安郡王瑗爲常  
德軍節度使恩平郡王琥武康軍節度使秋七月庚辰  
召鄭剛中赴行在辛巳太白晝見以徽猷閣待制知成  
都府李璆權四川宣撫使癸未命李璆同總領四川財  
賦符行中參酌減放四川重歛戊子以吳璘充御前諸  
軍都統制兼知興州八月庚子罷建州刦置賣鹽坊癸  
卯趙鼎薨于吉陽軍戊申遣沈該使金賀正旦詹大方  
賀金主生辰丁巳以諸路羨餘錢充月椿之數加邢孝

楊太尉九月己巳減四川科率虛額錢歲二百八十五萬緡癸酉詔以四川宣撫司降賜庫米一百萬石均減對糴乙亥蠲江南東西道諸州月椿錢丙子鄭剛中罷丙戌減江浙諸州折帛錢冬十月辛卯朔日有食之癸卯建太一宮丁未命太常歲以春秋二仲薦獻攢宮季秋遣御史按視己酉進楊存中爲少傅己未臨安府甘露降十一月丙寅奉檜上重修免役敕令格式丁卯復賜進士聞喜宴十二月辛卯朔禁諸州擅釋放流配命

官及事干邊防切要之人甲寅鄭剛中落職桂陽監居  
住丙辰金遣完顏宗藩等來賀明年正旦

十八年春正月己巳幸天竺寺遂幸玉津園二月乙未  
段拂罷尋落職興國軍居住以汪勃兼權參知政事辛  
亥聽趙鼎歸葬三月丁丑命楊政吳璘招關陝流民補  
殿前軍戊寅罷汀州諸縣上供銀蠲茶鉛本錢之半庚  
辰幸新太一宮壬午以秦熺知樞密院事乙酉禁民私  
渡淮及招納叛亡夏四月戊子朔日有食之庚子秦熺

乞避父子共政以爲觀文殿學士提舉萬壽觀兼侍讀  
提舉秘書省壬寅命嬉恩禮視宰臣班次亞右僕射甲  
辰賜禮部進士王佐以下三百三十人及第出身丙辰  
加士袞開府儀同三司五月戊辰加吳益太尉乙亥裁  
損奉使賞給丙子金遣蕭秉溫等來賀天申節癸未以  
李顯忠私取故妻于金降爲平海軍承宣使台州居住  
甲申罷四川宣撫司以李璆爲四川安撫制置使是月  
徽州慶雲見六月甲辰築九宮貴神壇于東郊戊申士

民曹溥等上尊號不許是月遣太府丞宋仲堪詣江州  
置獄鞫鄭剛中欺隱官錢福州侯官縣有竹實如米饑  
民採食之是夏浙東西淮南江東旱八月丙申汪勃罷  
丁酉以工部尚書詹大方簽書樞密院事兼權參知政  
事禁州縣士民飾詞舉留官吏閏月庚申免江浙湖南  
今歲和糴甲子命臨安平江二府淮東西湖北三總領  
所歲糴米百二十萬石以廣儲蓄壬申遣王墨卿使金  
賀正旦陳誠之賀金主生辰甲申辛道宗降官房州羈

管乙酉禁奉使三節人出境博易福建諸州賊平以所  
勅招奇兵爲殿前司左翼軍九月丙午詹大方薨冬十  
月丙辰以御史中丞余堯弼簽書樞密院事兼權參知  
政事十一月乙酉朔升感生帝爲上祀己亥胡銓移吉  
陽軍編管壬寅鄭剛中責濠州團練副使復州安置戊  
申禁四川買馬官吏私市蠻馬辛亥振紹興府饑十二  
月乙卯朔振明越秀潤徽婺饒信諸州流民丙寅借給  
被災農民春耕費丁卯命利路三都統措置營田以其

租克減免對糴之數戊辰蠲被災下戶積欠租稅庚辰  
金遣召守忠等來賀明年正旦

十九年春正月甲申朔以皇太后年七十帝詣慈寧殿  
行慶壽禮甲午罷國信所回易北貨癸卯幸天竺寺遂  
幸玉津園二月丁丑禁湖北溪洞用人祭鬼及造蠱毒  
犯者保甲同坐三月癸未朔日有食之甲辰鄭剛中移  
封州安置子良嗣等亦除名編管夏四月丁巳立孳生  
牧馬監賞罰格丙寅秘閣修撰張邵上奏檜在金國代

徽宗與尼堪書篆詔付史館以邵爲徽猷閣待制戊寅  
湖廣江西路建康府並甘露降五月壬午朔汀漳泉三  
州民田被賊蹂踐蠲其二稅戊戌賞平福建羣盜功以  
選鋒軍統制劉寶爲武泰軍承宣使餘將士遷秩有差  
庚子金遣唐括德溫等來賀天申節丁未減連英循惠  
新恩六州免行錢六月丁巳茶陵縣丞王庭珪作詩送  
胡銓坐謗訕停官辰州編管戊午秦檜上吏部續降七  
司通用法秋七月壬寅頒諸農書于郡邑八月辛未刺

浙東諸州強盜當配者充沿海諸軍九月戊申命繪秦  
檜像仍作贊賜之冬十月己未湖南副總管辛永宗停  
官肇慶府編管十一月壬辰合祀天地于圜丘大赦辛  
丑李椿年以經界不均罷丁未立州縣墾田增虧賞罰  
格是月命復蜡祭十二月丁巳金岐王亮弑其主亶自  
立己未詔無子女戶得解舉人太學生之獨居者並免  
役己巳命四川制置司歲募扈衛三百人赴行在丁丑  
金遣完顏充等來賀明年正旦

二十年春正月丁亥秦檜入朝殿前司軍士施全道刺  
之不中壬辰磔全于市癸卯趣諸路轉運司及守臣畢  
經界事丙午兩浙轉運副使曹泳言李孟堅誦其父光  
所撰私史語涉譏謗詔送大理寺二月戊申朔立守貳  
令尉營田增虧賞罰格庚戌禁民春月捕鳥獸蠲靜江  
府昭州上供折布錢三之一壬子罷經界所覆實官吏  
庚申免海外四州及瀘叙二州長寧軍經界三月庚辰  
金遣完顏思恭等來報即位癸未以余堯弼參知政事

給事中巫伋簽書樞密院事丙戌遣堯弼等賀金主即位戊子以秦熺爲觀文殿大學士萬壽觀使丙申李孟堅獄具詔李光遇赦永不檢舉孟堅除名峽州編管胡寅程瑀潘良貴張燾等八人緣坐黜降有差戊戌詔改正經界法之厲民者庚子以巫伋兼權參知政事壬寅胡寅責果州團練副使新州安置夏四月壬子以沒入官田悉歸常平司禁募民佃種癸酉置力田科募江浙福建民耕兩淮閒田是月信州妖賊黃曾等作亂陷貴

溪縣江西兵馬鈴轄李橫等討平之五月庚辰申禁諸軍差承接文字使臣伺察朝政癸未秦檜上中興聖統甲午金就遣完顏思恭等來賀天申節六月癸亥加秦熿少保詔大理寺鞫前太常主簿吳元美譏謗獄丙寅禁民結集經社是月建州民張大一作亂秋七月丙子罷招刺禁軍庚寅罷泉州漳汀三州經界八月甲辰朔量移張浚永州孫近虔州万俟卨沅州李若谷饒州李文會江州段拂南康軍並居住雷州守臣王趯坐交通趙

鼎李光停官戊申改建大理寺辛酉遣陳誠之使金賀  
正旦王曠賀金主生辰九月甲申以吳元美譏毀大臣  
除名容州編管丙申侍御史曹筠以附下罔上罷冬十  
月戊辰右廸功郎安誠坐文字謗訕送惠州編管秦檜  
有疾庚午命執政赴檜第議事十一月甲子檜始朝命  
肩輿入宮門二孫扶掖升殿不拜己巳金遣蕭願等來  
賀明年正旦

二十一年春正月癸未以兩淮民復業未久寬其租稅

庚子蠲平江府折帛錢三年二月甲寅夜雨電乙卯詔  
諸州置惠民局官給醫書壬戌遣巫俊等爲金國祈請  
使請歸淵聖皇帝及皇族增加帝號等事癸亥以余堯  
弼兼簽書樞密院事三月丁丑雨電丁亥蠲江浙荆湖  
等路中戶以下積年逋負夏閏四月己卯禁三衙掊勦  
諸軍丁亥賜禮部進士趙達以下四百四人及第出身  
五月辛亥罷利州路選刺義士戊午金遣劉長言等來  
賀天申節以吳璘楊政田師中並爲太尉六月甲戌括

淮南佃田所隱頃畝以理租稅辛巳命歲給大理寺三  
衙及州縣錢和藥劑療病囚秋七月壬寅以集英殿修  
撰知衢州曹筠爲四川安撫制置使辛亥罷柴米稅癸  
亥詔州縣官嘗被科率害民重罪者不得任守令親民  
官八月辛未秦檜上重修諸路茶鹽法壬申韓世忠薨  
詔進太師致仕癸酉追封通義郡王禁郡守特斷乙亥  
加岳陽軍節度使士摶開府儀同三司克萬壽觀使甲  
申遣陳夔使金賀正旦陳相賀金主生辰九月戊戌朔

籍寺觀絕產以贍學乙巳均科處州丁鹽錢丁巳增築  
景靈宮是月巫役使還所請皆不許冬十月甲戌幸張  
俊第壬午進俊爲太師升從子子蓋爲安德軍節度使  
甲申夜有赤氣十一月庚戌余堯弼罷乙卯命提舉常  
平官修復陂湖丁巳進義副尉劉允中坐指斥謗訕棄  
市十二月壬申雷發己金遣兀朮魯定方等來賀明年  
正旦

二十二年春正月丁未加韋淵太保三月丁酉以王庶

二子之奇之荀謗毀朝政並除名之奇梅州之荀容州  
編管甲辰以直龍圖閣葉三省監都作院王遠通書趙  
鼎庶力詆和議言涉謗訕三省落職筠州居住遠除  
名高州編管丁巳遣司農丞鍾世明詣福建路籍寺觀  
絕產田宅入官其後歲入錢三十四萬緡夏四月丙子  
巫伋罷辛巳以御史中丞章夏簽書樞密院事兼權參  
知政事五月癸丑金遣田秀穎等來賀天申節是月襄  
陽大水容州野蠶成繭秋七月甲午朔加封程嬰公孫

杵臼韓厥爲公升中祀丁巳虔州軍卒齊述殺殿前司  
統制吳進江西同統領馬歲據州叛八月己卯遣鄂州  
都統制田師中發兵同江西安撫使張澄殿前司遊奕  
軍統制李耕討述九月乙未又遣左翼軍統制陳敏相  
繼討之癸丑章夏罷冬十月甲戌以御史中丞宋樸簽  
書樞密院事兼權參知政事就命李耕知虔州庚辰以  
黃巖縣令楊煥誹謗除名萬安軍編管知台州蕭振落  
職池州居住十一月戊申合祀天地于圜丘大赦丁巳

立薦舉受財刑名李耕入虔州盡誅叛兵虔州平十二  
月辛酉朔減夔州路及蒲江清井兩監鹽錢歲八萬二  
千緡有奇戊子金遣張利用等來賀明年正旦


宋史卷三十

謹案卷二十九第六頁前七行以李綱為湖南路

安撫大使刊本綱訛刪據列傳改

第十五頁後七行金人犯盩厔縣刊本厔訛厔據  
地理志改又八行鄭剛中刊本鄭訛陳據列傳  
改





總校官庶吉士臣 張能照  
校對官檢討臣 蕭九成  
謄錄舉人臣 李駟

欽定四庫全書叢要

史部

宋史卷三十二



詳校官編修臣王天祿

欽定四庫全書

欽定四庫全書 舊要卷五千六百五十九

史部

宋史卷三十一

元中書右丞相總裁托克托等修

本紀第三十一

高宗八

二十三年春正月癸卯進韋淵太傅己酉復以李顯忠爲寧國軍節度使二月癸亥幸玉津園遂幸延祥觀庚午燬虔州軍賊黃明等八人于都市辛未改虔州爲贛

州壬申申嚴冒貫請舉法癸未賞平贛盜功以李耕爲  
金州觀察使將士進秩給賞有差三月丙午齊安郡王  
士懷薨于建州追封循王詔凡民認復軍莊營田者償  
開耕錢丁未禁州縣都監巡尉擅置刑獄戊申以前太  
府丞范彥輝謗訕除名荆門軍編管是春金主亮徙都  
燕京夏四月辛巳詔諸州編管羈管人遵舊法長吏月  
一驗視不許囚禁乙酉減利州歲鑄錢爲九萬緡五月  
庚寅禁州縣以私意籍罪人貲產乙巳復以蕭振爲四

川制置使辛亥金遣赫舍哩大雅等來賀天申節乙卯  
立淮南諸州舉人解額六月己卯潼川大水秋七月壬  
辰寬理平江府湖秀二州被水民夏稅戊戌從秦檜所  
請命合州取綦崇濃草檜罷相制所受墨勅庚戌禁諸  
軍瀕太湖擅作壩田八月乙丑士撙薨追封韶王丙寅  
左宣教郎王孝廉謀據成都叛事覺伏誅己卯賜秦檜  
建康府永豐圩田乙酉命勑令所編輯中興以後寬恤  
詔令九月甲午振潼川被水州縣仍蠲其賦庚子禁採

鹿胎冬十月丁巳詔郡守年七十者聽自陳命主宮觀  
戊午遣吳巢使金賀正旦施鉅賀金主生辰戊辰宋樸  
罷壬申以右諫議大夫史才簽書樞密院事兼權參知  
政事丁丑遣戶部郎官鍾世明修築宣州太平州圩田  
是月命大理鞫妖人孫士道獄十一月壬寅詔立張叔  
夜廟于信州甲辰班太宗正司條令乙丑以經筵終帙  
賜宰執講讀等官宴于秘書省爲故事十二月丁巳詔  
州縣稅額少者罷其監官癸亥韋淵薨癸未禁民車服

踰制閏月丙申命檢正都司官詳定郡守所上利病以聞辛丑命諸軍保任統制官在職十年無過者進秩庚戌金遣蔡松年等來賀明年正旦是歲減池州青陽縣田租萬七千石

二十四年春正月辛未幸延祥觀癸酉初詔郡國同以八月十五日試舉人丙子封婉容劉氏爲貴妃戊寅地震二月丁亥前左從政郎楊炬坐其弟煜嘗上書誹謗送邕州編管丙午加吳益太尉三月壬申楊再興復寇

邊前軍統制李道討平之禽再興及其子正脩正拱檻  
送行在乙亥賜禮部進士張孝祥以下三百五十六人  
及第出身庚辰秦檜以私憾据撫知建康府王循友詔  
大理鞫之是春始榷夔州路茶夏四月丙戌詔諸路招  
補三衙諸軍期三年課其殿最辛丑西南小張藩貢方  
物己酉羅殿國貢名馬五月癸丑朔日有食之衢州民  
俞八作亂圍州城通判州事汪召錫拒郤之遂掠嚴州  
壽昌縣遣殿前司正將辛立討平之辛未金遣耶律安

禮等來賀天申節六月癸巳史才罷甲午以御史中丞  
魏師遜簽書樞密院事兼權參知政事辛丑王循友貸  
死藤州安置癸卯詔嘗命四川州縣減免財物以寬民  
力尚慮未周令制置司總領所司共措置務在不妨軍  
食可以裕民尋遣鍾世明如四川同議以主管侍衛馬  
軍司成關爲慶遠軍節度使秋七月癸丑張俊薨勒停  
人王趯坐交通李光下大理獄乙卯讐猺人楊正脩正  
拱于市己未復置邛雅二州博易場三所壬戌詔捐四

川茶馬司羨餘錢給軍費以寬民力甲子復落蕭振職  
池州居住乙丑以總領財賦符行中爲四川制置使乙  
亥南丹州莫公晟及宜州界外諸蠻納土內附戊寅辛  
張俊第臨奠八月壬辰禁百官避免輪對甲午罷溫州  
市黃柑福州貢荔枝丙午追封張俊爲循王以湘潭縣  
丞鄭杞主簿賈子展嘲毀朝政除名杞容州子展德慶  
府編管九月辛亥朔李道如納州措置盜賊丁巳賞平  
衢賊功升辛立領忠州團練使將士遷職給錢有差冬

十月壬午蠲旱傷州縣租賦戊子遣沈虛中使金賀正  
旦張士襄賀金主生辰十一月乙丑魏師遜罷丁卯以  
權吏部侍郎施鉅參知政事鄭仲能簽書樞密院事戊  
辰進秦熺少傅封嘉國公是月以通判武岡軍方疇通  
書胡銓及他罪除名永州編管十二月丙戌以故龍圖  
閣學士程瑀有論語講解秦檜疑其譏已知饒州洪興  
祖嘗爲序京西轉運副使魏安行鏤版至是命毀之興  
祖昭州安行欽州編管瑀子孫亦論罪丁亥王趯除名

辰州編管丁酉知鄞縣程緯爲其丞王肇所告慢上無人臣禮除名貴州編管籍其貲壬寅刺諸路編管人充廂軍乙巳金遣白彥恭等來賀明年正旦

二十五年春正月辛未賞討楊再興功保寧軍承宣使李道落階官加龍神衛四廂都指揮使將士進官賜錢有差二月乙酉以鎮江都統制劉寶為安慶軍節度使建康都統制王權為清遠軍節度使壬寅以通判常州沈長卿仁和縣尉芮煜作詩譏訛除名長卿化州武

岡軍編管三月己酉右司郎中張士襄自金國使還坐  
奉使不肅罷官壬申地震夏四月乙酉施鉅罷以鄭仲  
熊兼權參知政事戊子命四川制置司許就類省試院  
校試刑法己亥減廣西路折米錢五月丁未朔日有食  
之太廟仁宗室柱生芝九莖戊申罷諸路免行錢歲百  
八萬緡癸丑以前知泉州宗室令衿譏訕秦檜遂坐交  
結罪人汀州居住乙丑金遣李通等來賀天申節壬申  
賜劉錡湖南田百頃六月庚辰鄭仲熊罷辛巳以禮部

侍郎湯思退簽書樞密院事兼權參知政事癸卯以言  
者追讚岳飛改岳州爲純州岳陽軍爲華容軍是月安  
南入貢秋七月丙辰減四川絹佑稅斛鹽酒等錢歲百  
六十餘萬緡蠲州縣積欠二百九十餘萬緡詔四川營  
田有占民田者常平司按驗給還甲戌封李天作爲南  
平王八月丁丑申嚴誣告加等法辛巳命大理鞫趙汾  
反令衿交通獄丙戌以吏部侍郎董德元參知政事蠲  
諸路身丁免丁錢一年壬辰建執政府九月丁巳秦檜

上紹興寬恤詔令冬十月庚辰復置鴻臚寺壬午遣王  
岷使金賀正旦鄭柟賀金主生辰乙酉命大理鞫張祈  
附麗胡寅獄乙未辛秦檜第問疾夜檜諷右司員外郎  
林一飛臺諫徐嘉張扶等請拜嬉爲相丙申進封檜建  
康郡王嬉爲少師並致仕命湯思退兼權參知政事是  
夕檜薨丁酉檜姻黨戶部侍郎兼知臨安府曹泳停官  
新州安置朱敦儒薛仲邕王彥傅杜思旦皆罷命有司  
具上執政侍從官居外任及主宮觀與在謫籍者職位

姓名辛丑徙殿中侍御史徐嘉右政言張扶皆出爲他  
官十一月乙巳朔追封檜申王謚忠獻賜神道碑額爲  
決策元功精忠全德戊申奪趙汾二官壬子以敷文閣  
直學士魏良臣參知政事癸亥合祀天地于圜丘大赦  
甲子辛未檜第臨奠乙丑復洪皓官釋張祈獄丁卯罷  
大理寺官旬白庚午詔監司郡守事無巨細皆須奏聞  
裁決毋得止上尚書省臣僚薦舉人才必三人以上同  
薦封叔和州防禦使右監門衛大將軍士俊爲崇慶軍

節度使嗣濮王福建路提刑令詔爲利州觀察使安定  
郡王辛未知建康府正會及列郡守臣王珦王鑄鄭僑  
年鄭震方滋俱以諂附貪冒罷真臘羅斛國貢馴象十  
二月甲戌朔詔曰臺諫風憲之地比用非其人黨於大  
臣濟其喜怒殊非耳目之寄朕今親除公正之士以革  
前弊繼此者宜盡心乃職母合黨締交敗亂成法當謹  
茲戒母自貽咎詔張浚折彥質方俟高段拂聰自便量  
移李光郴州安置乙亥復以高為資政殿學士提舉萬

壽觀兼侍讀戊寅鄭億年責建武軍節度副使南安軍  
安置壬午詔監司守臣禁羨餘罷權攝戢苞苴節宴飲  
詔前後告訐者莫汲汪召錫陸升之等九人除名廣南  
諸州編管甲申召孟忠厚奉朝請命胡寅張九成等二  
十八人並令自便仍復其官乙酉董德元罷丙戌以劉  
錡知潭州辛卯命三省六部條具續降勅旨來上審詳  
施行甲午以敷文閣待制沈該參知政事乙未以王會  
恃權貪橫停官循州編管丙申復以蕭振為四川制置

使復張浚折彥質趙汾葉三省王趯劉岑官移胡銓衡  
州丁酉禁閩浙川廣貢真珠文犀戎州縣加收耗糧已  
亥金遣耶律歸一等來賀明年正旦

二十六年春正月壬子省諸州稅場以寬商賈甲子追  
復趙鼎孫近鄭剛中汪藻舊職乙丑詔選擇監司須七  
品以上清望官或經朝擢及治郡著績者丙寅曹泳吉  
陽軍編管封伯令衿明州觀察使安定郡王以其從弟  
令詛讓也戊辰除民事律蠲諸路積負及黃河竹索錢

二月乙亥命四川州縣凡預借民賦稅分限理析己卯定諸州流寓士人解額庚辰罷進奏院定本朝報乙酉進士林東追謫秦檜上書狂妄英州編管右朝奉郎林一飛坐指使林東責監高州鹽稅庚寅三佛齊國入貢辛卯魏良臣罷庚子以左朝散大夫王曠為秦檜親黨直徽猷閣呂愿中貪虐附檜曠建昌軍居住愿中責果州團練副使封州安置三月甲寅以邊事已定罷宰相兼領樞密使丁巳詔兩淮邊民未復業者復其租十年

己未以万俟高參知政事癸亥加吳璘開府儀同三司  
乙丑以東平府進士梁勛伏闕上書言北事送千里外  
州軍編管丙寅詔曰講和之策斷自朕志秦檜但能贊  
朕而已豈以其存亡而渝定議耶近者無知之輩鼓倡  
浮言以惑衆聽至有偽撰詔命召用舊臣抗章公車妄  
議邊事朕甚駭之自今有此當重寘典憲丁卯蠲閩浙  
諸州歲供軍器所物料三之一減諸州工匠千人已已  
募四川民佃淮南京西閒田並邊復租稅十年次邊五

年夏四月戊子增溫台等十六州解額命湖北路以增  
戶墾田為守令殿最庚寅遣陳誠之等賀金主尊號禮  
成癸巳置武學官及弟子員百人甲午禁州郡進祥瑞  
戊戌立六科以舉士加韋謙太尉詔大辟情犯無可矜  
憫者禁刑寺妄引例奏裁貸減罷鄉飲酒舉士法詔淮  
南京西占射官田踰二年未盡墾者募人更佃五月壬  
寅以沈該為尚書左僕射方俟禹為右僕射並同中書  
門下平章事湯思退知樞密院事丁未詔州軍教授母

兼他職丙辰蠲楚州盱眙軍民租十年已未金遣敬嗣  
暉等來賀天申節六月辛未朔罷諸路鬻戶絕田丁丑  
以端明殿學士程克俊參知政事戊寅復權要親族中  
第覆試法乙酉詔取士母拘程頤王安石一家之說丁  
亥流星晝隕辛卯以秦檜既死命史館重修日歷秋七  
月辛丑詔三衙主帥舉武臣堪知州者壬寅蠲諸路丁  
絹一年為二十四萬匹丙午右奉議郎薛仲邕連州編  
管丁未彗出井避殿減膳辛亥詔諸州守貳考各縣丁

籍依年格收除民間市物官戶勢家與編氓均科丙辰  
彗滅詔進士因事送諸州軍聽讀特放逐便仍許取應  
辛酉雨水銀八月戊寅班元豐崇寧學制于諸路革正  
前舉登第秦墳曹冠等九人出身以淮南提舉常平朱  
冠卿言秦檜挾私廢法墳等皆其子孫親戚門下憲人  
於是又有官應試者所授階官易左為右白身者駁放占  
用省額復還後科庚辰裁州縣吏額己丑蠲建康府積  
欠內帑錢帛庚寅安南國遣使入貢辛卯程克俊罷甲

予以吏部侍郎張綱參知政事九月乙巳以翰林學士  
陳誠之同知樞密院事丙午立互易薦舉坐罪法壬子  
詔成都潼川兩路漕臣同制置總領茶馬司審度四川  
財賦利害其實惠得以及民調度可以經久者條具以  
聞甲寅以天聖紹興真決贓吏指揮班示諸路丙寅增  
大理寺吏祿戊辰命吏刑二部修條例為成法冬十月  
己巳朔詔許秦檜在位之日無辜被罪者自陳釐正罷  
浙東常平司平準務乙亥詔四川監司帥臣制置總領

茶馬司各舉可守郡者甲午蠲郴道永三州桂陽軍民  
身丁米乙未王會移瓊州編管以宋貺黨附秦檜責梅  
州安置丁酉以張浚上書論用兵依舊永州居住辛丑  
遣李琳使金賀正旦葛立方賀金主生辰閏月丙午罷  
廉州貢珠縱蚕丁自便己酉命離軍人願歸農者人給  
江淮湖廣荒田百畝復其租稅十年乙卯初置臨安府  
左右廂官分掌訟牒十一月甲戌命吏部侍郎陳康伯  
戶部侍郎王俣稽考國用歲中出納之數丙戌裁定六

曹寺監百司吏額十二月辛丑命三省錄臺諫所言事  
報樞密院癸丑万俟高上重修貢舉勅令格式甲寅罷  
諸路鑄錢司庚申賞應詔論事切當者壬戌三佛齊國  
入貢甲子金遣梁暉等來賀明年正旦

二十七年春正月乙酉幸延祥觀戊子命侍從各薦宗  
室京朝官才識治行者二人二月丁酉朔復兼習經義  
詩賦法庚子楊政卒壬寅太廟仁宗英宗兩室柱芝草  
生戊午以御史中丞湯鵬舉參知政事庚申更定福建

路鹽法癸亥加劉錡太尉三月己巳命京局改官人先  
除知縣乙酉赤氣出紫微垣丙戌賜禮部進士王十朋  
以下四百二十六人及第出身丁亥詔焚交趾所貢翠  
羽于通衢仍禁宮人服用銷金翠羽己丑減三川對糴  
米歲十六萬九千石夔路激賞絹五萬匹兩川絹估錢  
二十八萬緡及茶司引息虛額錢歲九十五萬緡辛卯  
万俟高卒壬辰以符行中前在蜀恣橫南雄州安置甲  
午除耕牛稅五月癸未金遣耶律守素等來賀天申節

辛卯復以五帝神州地祇等十三祭為大祀六月甲辰  
命臣僚轉對盡忠開陳母撫細微以應故事戊申以湯  
思退為尚書右僕射同中書門下平章事庚戌復余深  
黃潛善並觀文殿大學士乙卯裁定離軍將士諸州添  
差數戊午初命太廟冬饗祭功臣臘饗祭七祀祫饗兼  
之己未進錢忱少傅增命官捕獲私茶鹽賞典秋七月  
己巳復饒贛韶三州鑄錢監癸酉戒監司郡守舉劾守  
令觀望徇私乙亥以龍圖閣學士李文會為四川安撫

制置使丙子詔凡出命令先經兩省書讀如舊制八月  
乙未以湯鵬舉知樞密院事庚申復置提領諸路鑄錢  
司于行在以戶部侍郎榮薿領之九月癸酉張綱罷戊  
寅以吏部尚書陳康伯參知政事蠲淮南江西湖北積  
欠內藏錢帛丁亥校書郎葉謙亨言祀典散逸隆殺不  
當名稱或舛請勅禮官祕書酌景德故事取祭祀之式  
定為一書名曰紹興正祠錄以為恒制詔從之冬十月  
壬寅有赤氣隨日入癸卯築通泰楚三州捍海堰辛酉

詔四州諸司察旱傷陽州縣捐其稅振其饑民十一月癸亥朔減福建鹽鈔錢歲八萬緡乙丑遣孫道夫使金賀正旦辛巳遣劉章賀金主生辰丁亥湯鵬舉罷戊子蠲廬州二稅及上供錢米一年十二月甲午詔廣南經略市舶司察蕃商假託入貢丙辰初命州縣置禁歷戊午金遣高思廉等來賀明年正旦

二十八年春正月己巳申禁三衙彊刺平民為兵己卯幸延祥觀遂幸玉津園壬午禁諸路二稅折納增價癸

未遣戶部郎中莫濛等檢視淮南浙江東沙田蘆場  
甲申命臺諫侍從三人以上公薦監司治狀二月癸巳  
命史館重修徽宗大觀以前實錄丙申以陳誠之知樞  
密院戊戌禁沿海州軍博買乙巳以工部侍郎王綸同  
知樞密院事己酉命六曹長貳詳定差役舊法癸丑加  
楊存中少師謚張俊曰忠烈三月辛酉朔日有食之丙  
寅雪丁丑加田師中開府儀同三司戊寅詔自今用人  
選帥臣監司曾任郎官已上者為侍從監司郡守有政

績者為卿監郎官朝官二年乃遷卿監郎官未歷監司  
者更迭補外戊子責秦檜黨宋樸徽州居住沈虛中筠  
州居住夏四月丙申復詔文武官非犯贓罪並許以致  
仕恩任子辛亥雨雹嚴州遂安賊江大明寇衢州官軍  
捕斬之五月金遣蕭恭等來賀天申節六月壬辰太白  
晝見癸巳流星晝隕甲寅增浙江東淮東沙田蘆場  
租課置提領官田所掌之秋七月庚申立江西上供米  
綱賞格戊辰詔監司按發官吏不得送置司州軍推鞠

所犯涉重即以奏聞命鄰路監司選官就鞫已卯命取  
公私銅器悉付鑄錢司民間不輸者罪之庚辰親製郊  
廟樂章乙酉復鬻沒官田八月戊子朔置國史院修神  
哲徽三朝正史己丑檢放風水災傷州縣苗稅仍振貸  
饑民乙未增四川十七州舉人解額戊戌湯思退等上  
徽宗實錄壬寅命戶部侍郎令詎提領諸路鑄錢甲寅  
地震九月辛未定銅錢出界罪賞甲戌詔以吏部七司  
舊制與續降參訂異同立為定法丁丑置殿前司虎翼

水軍千人庚辰以中書舍人王剛中為四川安撫制置使辛巳封叔建州觀察使士輶為昭化軍節度使嗣濮王癸未蠲平江紹興湖州被水民逋賦冬十月丁亥朔遣沈介使金賀正旦黃中賀金主生辰辛丑禁監司帥守私役軍匠十一月己卯合祀天地于圜丘大赦壬午復命檢舉諸人因赦移放者告訐得罪者不預十二月庚寅安定郡王令衿薨辛丑修睦親宅建宮學丁未復李光官放自便戊申蠲楚州歸附民賦後五年壬子金

遣蘇保衡等來賀明年正旦是歲興元都統制姚仲復  
籍興元府等五州義士得二萬餘人

二十九年春二月丙辰朔以皇太后年八十詣慈寧殿  
行慶壽禮庚申濬平江二十六浦以泄水庚午振湖秀  
諸州饑民癸酉幸延祥觀遂幸玉津園庚辰禁諸州科  
賣倉鹽癸未蠲沙田蘆場為風水所侵者租之半是月  
金國罷沿邊榷場惟泗州如舊二月丙戌朔亦罷沿邊  
榷場存其在盱眙者加吳璘少保己丑禁海商假託風

潮私往北界壬辰除臨安府歲供修的司錢三萬六千  
緝丁酉蠲四川折估糴本積欠錢三百四十萬緝戊戌  
大雪雨雹己亥禁貿易廣南羈縻州物貨命廣西教閱  
峒丁庚戌罷諸路斥候遞卒甲寅取具貶死臣僚姓名  
議加恩典三月丙子除州縣積欠錢三百九十七萬緝  
有竒及中下戶所欠入官錢物丁丑詔侍從臺諫帥臣  
監司歲舉可任將帥者二人限命官子孫制田減父祖  
之半然其詭名寄產者格外田畝同編戶科役已卯除

湖州平江紹興流民公私逋負夏四月壬辰國子司業

黃中自金國使還言金人將徙居汴京以見逼望早飭  
邊備宰相怒不聽己亥修三省法庚子增置帶御器械  
四員丙午禁內外將佐營造回易掊歛軍士辛亥命縣  
令有政績者諸司同薦不次升擢以風厲之五月甲寅  
朔罷鬻福建閩生沙田丁巳詔殿前司選統制官部兵  
千人戍江州彈壓盜賊每歲一易己未椿頃江浙四路  
折帛錢于三總領所及浙西提刑司以備軍用辛酉禁

權要豪民舉錢軍中取息丁卯命印給三總領所見錢  
公據閩子許商人入納己巳立監司守臣舉劾八條金  
遣王可道等來賀天申節六月甲辰朔遣王綸等為金  
國奉表稱謝使丁亥禁江淮私渡北人丙申陳誠之罷  
禁積錢民戶過萬緡官戶過二萬緡滿二年不易他物  
者沒入之丁酉申禁包苴請託己亥以陳康伯兼權樞  
密院事辛丑李光卒壬寅以主管步軍司趙密為太尉  
己酉沈該以貪冒罷閏月甲寅益荆南戍卒千人守臣

劉錡亦募效用三千人丁已命江湖浙西五漕司增價  
糴米二百二十萬石赴沿江十郡自荆至常州以備振  
貸庚午罷成都府路隔槽酒務監官七十一員令民承  
買己未罷江浙淮東沙田蘆場所增租課甲子落沈該  
觀文殿大學士致仕罷福建安撫司官賣鹽戊辰大省  
淮西冗官辛未復置江淮荆浙福建廣南路提點坑冶  
鑄錢官秋七月丁亥以權吏部尚書賀允中參知政事  
癸巳封權戶部侍郎令諱為安定郡王戊戌福州大水

己酉禁諸路抑買官田庚戌以四川經總制及田畝錢糧錢共百三十四萬緡克增招軍校費八月甲子募化人輸米行在諸倉願以茶鹽礮鈔等償直者聽丁卯除南雄英連三州經界復丁米舊額甲戌併史館歸祕書省玉牒所歸宗正寺九月甲申詔建炎以來使未還而後嗣無祿者與一子官乙酉王綸使還入見言金國和好無他丙戌湯思退等稱賀甲午以湯思退為尚書左僕射陳康伯為右僕射並同中書門下平章事乙未以

皇太后不豫大赦不視朝丙申為太后祈福蠲中下戶所欠稅賦及江浙蝗潦州縣租丁酉減僧道免丁錢已亥蠲見監贓罰賞錢庚子皇太后韋氏崩癸卯遣周麟之等為金國奉表哀謝使冬十月甲寅以羣臣五上表始聽政命保康軍節度使吳益為攢宮總護使乙亥立諸路和糴募民運米賞格戊寅冊謚皇太后曰顯仁十一月丁亥遣賀允中等為金國遺留國信使丙午權攢顯仁皇后于永祐陵十二月甲寅諜言北界禁民妄傳

起兵帝諭大臣常自治為安邊息民之計甲子祔顯仁  
皇后神主于太廟辛未以王綸知樞密院事壬申減三  
省樞密院激賞庫及諸書局歲用錢二十萬緡鼎州程  
昌寓所增蔡州官兵衣糧錢四之一西和州官賣鹽直  
之半蔣州上供經總制司無額錢如之丙子金遣施宜  
生等來賀明年正旦

三十年春正月戊子給劉錡軍費錢六十萬緡丙申以  
吏部侍郎葉義問同知樞密院事廢御書院丁酉罷鈞

容班樂工及甲庫酒局壬寅募人墾淮南荒田甲辰定  
御輦院三營兵額為九百人二月甲寅罷夔州路榷茶  
乙卯金遣大懷忠等來弔祭戊午遣葉義問為金國報  
謝使癸酉詔立普安郡王瑗為皇子更名璋丙子進封  
建王三月辛巳復館職召試然後除擢免湖北京西宣  
撫司諸庫未輸錢八十九萬緡癸未以淮東茶鹽司錢  
十萬緡克募民憇田費乙酉加吳益少保趙密開府儀  
同三司以賞攢宮之勞丁酉初置金州御前諸軍都統

制以知金州王彥為之癸卯賜禮部進士梁克家以下  
四百一十二人及第出身甲辰置牧馬監于潮惠二州  
丙午加恩平郡王璩開府儀同三司判大宗正事始稱  
皇姪夏四月己酉朔以孫愭為蘄州防禦使愷貴州團  
練使惇榮州刺史丙辰以賀允中兼權同知樞密院事  
五月辛巳刺海賊罪不至死者為龍猛龍騎軍初置荆  
南府御前諸軍都統制以劉錡兼領之乙酉初置江州  
御前諸軍都統制以步軍司前軍都統制戚方為之詔

諸路刺強盜貨死少壯者為兵丙戌定鑄錢司歲鑄五十萬緡辛卯臨安於潛安吉三縣大水海賊陳演添作亂掠當雷二州境上南恩州民林觀禽殺之命觀以官丙申金遣蕭榮等來賀天申節壬寅落沈該致仕復觀文殿大學士知明州丙午加吳益太尉六月庚戌復出諸軍見錢闕子三百萬緡聽商賈以錢銀請買庚午王綸罷辛未以江西廣東湖南折帛經總制錢合六十萬緡江西米六萬石克江州軍費後益以四州利路經總

制江西茶引合二十萬緡秋七月戊寅遣明州水軍三百戍崑山黃魚梁巡捕檣船之為盜者甲申詔諸路帥司春秋教閱禁兵弓弩手戊戌以葉義問知樞密院翰林學士周麟之同知院事御史中丞朱倬參知政事八月丙子朔日有食之壬子賀允中使還言金人必叛盟宜為之備癸丑允中致仕甲寅復以四川經總制錢五十萬緡給總領所增招兵士壬申淮東總管許世安奏金主亮至汴京起重兵五十餘萬屯宿泗州謀來攻九

月庚寅以帶御器械李寶為浙西副總管提督海船駐平江丙申命劉寶招制勝軍千人丁酉罷內侍省冬十月丙午罷內侍官承受諸軍奏報文字丁未遣虞允文使金賀正旦徐度賀金主生辰庚戌雷辛酉鎮江都統制劉寶以專悍貪橫罷壬戌以劉錡為鎮江都統制荆南右軍統制李道為都統制癸亥日中無雲而雷癸酉蠲舒和蘄黃四州民附種田租十一月庚辰禁諸路折輸職田錢癸巳夜有白氣出入危昂間十一月乙巳朔

湯思退罷初行會子于東南戊申夜白氣亘天海南黎  
賊王文滿平已酉罷招刺三衙及江上諸軍庚戌禁掠  
賣生口入溪峒癸丑命戶部立經總制錢十年中數為  
定額丁卯金遣 樂等來賀明年正旦

宋史卷三十一